

### INSAIT



• **Micah kamap long kot tude**

- pes 2

• **Skate rabisim toktok bilong Luke Lucas**

- pes 2



• **MUTRUS KANAGE BILONG DISPELA WIK**

- pes 11

**KANAGE**



# Sir Pita autim pamuk video long Palamen

## YAKAM KELO i raitim

OPOSISEN i mekim Gavman i guria long Palamen asde taim Sir Pita Lus i tokaut olsem wanpela memba insait long PNG Fes (First) Pati i mekim pasin pamuk long yangpela meri krismas bilong em 15. Sir Pita tokaut tu olsem dispela pasin pamuk tu i pretim Praim Minista na pati bilong em i rausim K9 milien dinau bilong wanpela kampani long beng.

Lapun bilong Palamen na Memba bilong Maprik, Sir Pita Lus, i ritim wanpela ripot long Palamen asde long salensim Praim Minista Bill Skate long wanem samting em bai mekim long dispela pasin.

Sir Pita Lus i askim Praim Minista sapos:

- Praim Minista i save o i no save olsem i gat wanpela video tep i soim wanpela memba bilong PNG Fes (First) Pati we i wokim pasin pamuk wantaim sampela yangpela meri (i gat 15 kris-

mas);

- I tru o i no tru olsem Praim Minista yet i bin lukim dispela tep long haus bilong dispela memba long sampela taim long mun Mas long dispela yia 1998?

- Sapos dispela i tru, bai Praim Minista i mekim wanem samting long dispela lida?

- I tru o i no tru olsem dispela tep i pundaun long han bilong papa bilong wanpela kampani, na em i yusim long salensim (blackmail) Praim Minista na Praim Minista i givim em wanpela posisen (wok) long opis bilong em;

- I tru o i no tru olsem Praim Minista yet i bung wantaim presiden bilong PNG Fes Pati na dispela memba husat i stap long video tep na ol i givim oda long wanpela beng long rausim dinau bilong dispela kampani?

- I tru o i no tru olsem dispela kampani em i bin i gat K9 milien dinau mani long beng olsem na ol i bin makim wanpela risivia menesa long 1998?



• **Sir Pita Lus.**

- Praim Minista i save o i no save olsem dispela risiva i pinis wok long 1998, taim dispela beng na i rausim dispela dinau bilong kampani?

- Dispela ol bikpela tok strong long korapsen we i soim Praim Minista na ol memba bilong em i brukim planti seksen bilong lo

bilong kantri. Praim Minista bai mekim wanem long dispela korapsen pasin we mipela olgeta i sanap long daunim?

- Planti kampani na man long PNG i gat dinau. Praim Minista bai bihainim dispela rot bilong korapsen na rausim ol dinau bilong ol arapela PNG manmeri na kampani o nogat?

- Praim Minista, mi nau i gat dispela video tep na ol pepa bilong beng na risiva na mi askim tok orait bilong palamen long tebolim dispela ol ripot?

- Inap Praim Minista i makim sampela indipenden plisman bilong ausait long PNG long glasim tep na ol pepa (document) na bringim ol hambak man i go long kot o nogat?


- Bikos ol dispela komplek i sut stret long Praim Minista na pati bilong em, inap Praim Minista nau i risain na larim Palamen long makim nupela lida long stiaim kantru gut?

- Bihain long Sir Pita Lus i ritim dispela pepa, em i

kisim vidio tep na pepa i go long givim ol kuskus bilong Palamen long tokaut. Tasol ol Gavman memba olsem Minista bilong Fores na Pablik Entaprais Dokta Fabian Pok, Minista bilong CIS Peter Arul, Minista bilong Jastis Jacob Wama, Minista bilong Difens Peter Waieng na Minista bilong Foren Afeas Roy Yaki i mekim ol toktok egensim Sir Pita Lus. Ol i tok dispela toktok i sut long bagarapim nem na man. Olsem na spika i noken oraitim dispela tep yet.

Palamen Spika John Pundari i tok em bai holim dispela tep na ol pepa na lukim pastaim. Tasol Mista Pundari i tok nogat wanpela man bai kisim sapot o helpim sapos ol dispela pepa na vidio tep i tru.

Sir Pita Lus i no tokaut tu long nem bilong dispela memba na dispela kampani we ol i rausim K9 milien dinau bilong em. Olgeta ripot ya i stap long vido tep na ol pepa we Spika bilong palamen i kisim.



# MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

# PLIS RIPOT

**HAGEN, ISTEN HAILANS:** Nainpela kalabus lain i bin ronawe long Isten Hailans las wiken, ol plis long provins i tok.

Tupela i ronawe long Bihute haus kalabus na sevenpela long Goroka plis stesen.

Plis i tok Teine Kaupa Bomai bilong ples Kama long Gumine eria i bin stap long kalabus long laip o inap em i dai i bin ronawe long Bihute kalabus. Em bin go long kalabus long bagarapim meri na tu long kilim dai narapela meri, Spencer Boiboi bilong Simbu provins.

Plis i tok ol dispela husat i bin ronawe long Goroka plis stesen em plis i bin holim ol long ol strit trabel nabaut. Bikos plis sel bilding i lapun pinis na planti samtig i wok long bagarap, ol trabel lain i suvim dua op na ol i ronawe, plis i tok.

Isten Hailans Plis Komanda Baclay larume i tok planti trabel man i save ronawe long plis sel bikos selhaus bilding i olupela na maski ol i askim plis dipatmen na provinsel gavman long mani bilong stretim ol bagarap, ol no kisim wanpela gutpela bekim long en. Em i tok plis long Isten Hailans i mekim gutpela wok tasol ol nogat gutpela hap long putim ol trabel lain.

**NU AILAN:** Ol stilman i bin brukim haus bilong Katolik Bisop bilong Nu Ailan Ambrose Kiapsen na stilim ol samtig we pe bilong ol inap long K2,000, plis long Kavieng i tok.

Provinsol Plis Komanda Philip Solala i tok ol stilman i bin go insait long haus bilong bisop long baksait dua na stilim ol klos na ol arapela samtig long haus. Nogat man i bin stap long haus taim ol stillain i wokim stilpasin. Plis i mekim ol wok painimaut long dispela samtig.

Long narapela, sampela stilman i bruk i go insait long Kavieng Hotel long las Sarere moning na stilim foapela katen bia. Pe bilong ol inap long K240. Plis i wok long lukluk long dispela samtig.

**LAE, MOROBE:** Tupela man i stap wantai bagarap long Jusa Praivet haus sik bihain ol raskol i sutim ol klostu long Butibam matmat las Fraide. Boda /kostel plis komanda Tom Kulunga i tok draiva na peimistres bilong wanpela kampani i wok long go bek long opis bihain ol i kisim mani bilong peim ol woklain long beng taim foapela stilman i hensapim ol klostu long ples Butibam.

Draiva i pait wantaim ol stil lain na taim narapela ka i kam, ol stillain i sut long draiva na peimistres bipo ol i ronawe. Ol no bin kisim mani long tupela draiva na peimistres. Plis i kisim nem bilong ol stil lain na ol bai holim pasim ol yet.

**MADANG:** Wanpela man i bin dai long bagarap insait long bodi bilong em bihain pikinini, man bilong em i paitim em wantaim sia. Dispela birua i bin kamap long ples Umude insait long Madang provins.

Plis i autim nem bilong daiman olsem John Barkone husat i gat 49 krismas. Em i bilong Isten Hailans provins. Plis i tok em na meri bilong em i krosipait i stap na pikinini bilong ol i kam na paitim papa bilong em wantaim sia. Ol bin karim em i go long Madang haus sik na em i dai.

# Praim Minista tok ol toktok bilong Lucas i no tru

**VERONICA HATUTASI i raitim**

PRAIM Minista Bill Skate insait long palamen long dispela wik i tok ol toktok i no tru we i sut long em olsem em i wokim wanpela dil wantaim Sanlain long peim ol K19 milien (US\$9) sapos ol i tokaut long paul pasin we olupela praim minista Sir Julius Chan i bin mekim long kisim ol i kam long kantri long stapim hevi long Bogenvil.

Memba bilong Manus Charlie Benjamin long taim bilong askim kwesten long palamen i bin askim Mista Skate faivpela kwesten long stetmen we olupela edvaisa bilong em Luke Lucas i bin putim long Sanlain kot long dispela wik.

Long dispela stetmen, Mista Lucas i tok Mista Skate i bin salim em (Lucas) i go long Singapo long mun Septemba las yia bilong bungim wanpela bikman bilong Sandlain long hap Michael Grindberg, na kisim ol toktok long en bilong rabisim Sir Julius.

Tasol Mista Grindberg i no bin gat toktok long mekim bikos ol nogat save long pasin nogut (korap) we Sir Julius i mekim long kisim ol Sanlain i kam insait long kantri. Mista Lucas i bin olupela Iktorel Komisina bilong PNG na em i bin kamap

olsem wanpela naturalais sitisen bilong kantri.


Taim Praim Minista Skate i winim top sia bilong kantri, em i kisim em olsem wanpela edvaisa bilong em tasol bihain long foapela mun, em i rausim em long wok bihain long ol toktok bilong Mujo Sefa tep i kamap. Nau Mista Lucas i stap long Kens, Australia wantaim meri bilong em.

Taim em i bekim ol askim, Mista Skate i tok em no bin salim Mista Lucas long wokim wok bilong gavman bikos ol lain tasol bilong atoni jenerel i bin gat atoriti long mekim ol wok painimaut long Sandlain na i no narapela lain.

Em i tok Mista Lucas i bin go long Singapor long kisim nupela meri Tailen bilong em. Mista Skate i bin tok kain man olsem Mista Lucas i laik kamapim trabel tasol long kantri na wokim ol giaman tok-tok olsem.

Wanpela telivisen nius ripot we ABC i autim i tok loya bilong Sanlain i tok em i tru Mista Lucas i bin bungim wanpela opisa bilong ol long Singapo. Na Praim Minista Bill Skate i bin salim em long wokim wanpela dil long stretim sait bilong Sandlain egens long stet.

Ol toktok long disepla samtig i go het long Sanlain kot long Mosbi tude.



• Luke Lucas

## PNGBC sambai long helpim ples pipel

DINAU o lon seksen wantaim Papua Niugini Benking Koporesen i kirapim wanpela risos seksen long helpim ol asples i wokim ol liklik projek we i sut long Forestri na fising.

Dispela i bihainim planti ol timba kampani bilong Esia i pasim ol operesen na go bek long kantri bilong ol. Taim dispela i kamap, ol i lusim planti diwai i stap na bagarap nating.

Gavana bilong Sandaun John Tekwie i bin askim Forestri Minista Dokta Fabian Pok wanem plen gavman i gat long

foapela rijon bilong kantri long daunim dispela hevi.

Mista Tekwie i bin tok 90 pesen bilong loging bisnis long kantri em ol lain Malesia i bosim tasol nau wantaim hevi long mani we ol kantri long Esia i bungim, planti kampani i wok long pinisim planti ol woklain naskelim daun ol operesen. Em i askim gavman wanem kain progrem em i gat long ol pipel long helpim sevim ol risos bilong ol.

Minista Pok i tok gavman i kirapim pinis wanpela risos sek-

sen long Lon o dinau dipatmen bilong PNGBC beng we ol i givim dinau mani long ol asples lain bilong katim ol diwai na wokim timba long en na ol arapela samtig moa gen long salim.

Dokta Pok i tok ol i givim pinis K2.8 milien long Gasmata Holdings insait long Wes Nu Briten bilong go het na katim ol diwai we kampani i bin lusim. Wankain helpim tu ol bai givim long ol arapela grup long sait bilong forestri na fising, Dokta Pok i tok.

## Helikopta bai helpim wok long daunim hevi

PRAIM MINISTA Bill Skate i tok em i wokim dil long baim helikopta long Indonesia tbilong helpim daunim hevi bilong lo na oda long Mosbi.

Mista Skate i wok long bekim askim bilong Nu Ailan memba Paul Tohian husat i bin askim watpo tru na gavman bai tromoi K3 milion long baim tripela helikopta long Indonesia.

Gavman i bin wokim komitmen long dispela samtig taim praim minista na ol lain bilong em i mekim wokabout i go long Indonesia las mun.

Mista Skate i bin tok bikos long hevi bilong lo na oda i wok long go nogut, planti pipel na ol bisnis lain i stap wantaim wari na ol helikopta bai helpim long daunim ol hevi. Em i tok tu olsem dispela dil i wanpela rot we bai strongim gutpela wokpren na bung namel long tupela kantri.

Mista Tohian i bin askim tu long pasin we gavman i putim takis i go antap long flai in na flai aut rot we ol wokman bilong ol maining kampani long kantri i save wokim na nau ol top menesmen i muvim ol famili bilong ol long Kens Australia.

Mista Skate i bin tok em i samtig bilong ol kampani long wokim disisen long laik bilong ol tasol gavman i wok wantaim ol bisnis haus long kliarim na stretim dispela samtig.

## Ol aid grup les long helpim PNG

OL helpim kantri na ogenaisesen i les long givim mani long PNG nau. Bikos yumi i no yusim gut mani ya. Na tu yumi no soim gutpela na klinpela rekot bilong wanem ol wok mipela i spendim mani. Praim Minista Bill Skate i tokaut olsem. Praim minista i mekimdispela toktok taim em lonism Dipatmen ov Praim Minista Koporet Plen long Palamen Haus long Mosbi las wik.

Na Wantok i ripot long tupela wik i go pinis olsem, aid mani o helpim long ol grasrut pipel na projek insait long kantri bai hat liklik nau. Bikos sampela lain save gaiman na kisim dabol mani o kisim nating mani taim projek i no kamap. Na saveman i yusim ol trangu ol man long ples i no

save long rit na rait long giamanim ol aid ogenaisesen long kisim mani.

Praim Minista Bill Skate i tok ausa i stap long gavman. Bikos ol saveman na meri na wokman bilong gavman i no mekim wok bilong ol stret. Ol les long wok na helpim developmen bilong kantri. Praim minista i tok ol publik sevan i les na i no karim aut o kabinet na gavman disisen. Olsem na sevis na developmen i no go long ol pipel.

Em i tok klostu mak olsem 30 pesen bilong ol kabinet disisen na publik invesmen ol publik sevis i no mekim kamap na i karim kaikai. Olsem na ol aid ogenaisesen i les long givim mani.

## Nau, Laip i hat tumas!

Plenim gut sindaun bilong yu na femili bilong yu. Bihainim ol rot bilong femili plening.



Sapos yu laik save moa long ol rot bilong femili plening; rait i kam long:

**PNG Family Health Association,**  
P.O. Box 839, Lae, Morobe Province.  
Phone: 472 6523 Fax: 472 6296  
Clinic Phone: 472 3104

# WANTOK

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea

Publishing Weekly, Thursday, for  
**Word Publishing Company Pty. Ltd.**

Printed and published by Anna Solomon of Bitter Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and  
Group Editor in Chief:  
Anna Solomon.  
Advertising Manager:  
Mike Kanin.

Papers distributed by air  
throughout PNG.  
Available by air mail  
subscription within  
Papua New Guinea  
and overseas  
Email address:  
word@global.net.pg

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

# WANTOK

NIUSPEPA BILONG OL PAPUA NIUGINI

## Mipela bagarapim mipela yet nau

Dispela wik em kainkain ripot i kam aut we i sut long paul pasin egensim ol lida bilong kantri.

Long stat bilong wik, Sandlain ripot i givim nupela ripot long Praim Minista Skate olsem em bin salim olupela edvaisa bilong em, Luke Lucas, wantaim bikipela mani i go long Singapo. Na laik givim long Sandlain lain long autim sampela pekato bilong olupela praim minista Sir Julius Chan.

Praim Minista Bill Skate i rabisim ol toktok o ripot bilong Luke Lucas, em i bin kam aut long Sandlain kot. Na tok dispela olupela ilektorel Komisina, na bihain edvaisa bilong em i giaman tasol long bagarapim o daunim nem bilong em na gavman.

Sandlain kot i harim tu olsem Skate i sapatim ol soldia olsem Jerry Singirok na Meja Walter Enuma long rausim Sandlain i go ausait long kantri.

Asde long Palamen, Memba bilong Maprik Sir Pita Lus i autim toktok long praim minista, sapos em i save long wanpela memba bilong PNG First Pati i stap insait long wanpela vidio nogut, wantaim yangpela meri we i gat 15 krismas. Em i no givim nem bilong dispela memba.

Spika bilong Palamen tok em bai lukim pastaim dispela tep. Na bihain mekim disisen long en.

Nau yet i nogat save sapos dispela ripot i tru o nogat. Tasol kain ol pasin bilong daunim wanpela na narapela i givim moa nem nogut long kantri na pipel.

PNG kisim nem nogut pinis long Sandlain hevi. Na bihain long ol tep bilong olupela edvaisa bilong PM, Mujo Sefa. Dispela wik, tupela nupela moa ripot i kam aut.

Sapos Skate gavman bai winim gen dispela salens i kam long Oposisen o nogat, em bilong stap na lukim. Tasol bikipela samting em, mipela i bagarapim mipela yet nau.

# Kot bilong Micah tude



Ben Micah

NESENEL kot long Waigani bai harim sas bilong olupela memba bilong Kavieng Ben Micah tude, Fonde Jun 25.

Mista Micah inap long kamap long ai bilong Kavieng Distrik kot long las wik Jun 15 tasol ol loya bilong em, Henao Loyas husat i bin makim em i


lputim keis long nesenel kot long rivuwim long tude, Provinsol Plis Komada long Kavieng, Inspekta Philip Solala i tok.

Ol bin putimaut waren long holim pasim Mista Micah long Ogas las yia long tupela sas bihainim nesenel ileksen.

Plis long Kavieng i bin sasim Mista Micah long tupela samting. Wanpela em long paitim wanpela ilektorel opisa na narapela em long bagarapim ol samting na olgeta dispela i sut long kanding bilong ol (ileksen) vot long Nu Ailan provins.

Distrik Kot long Kavieng i bin nap long harim kot bilong Mista Micah long Septemba 9, 1977 tasol em i save stap long Mosbi na ol Kavieng plis i no nap long holim pasim na sasim em.

Mista Micah nau i holim wok olsem siaman bilong Telikom Bod.



Wanpela riot skwat plisman i was long skul.

## Plis was nau long Ororo skul

MATHIAS MALE i raitim

WANPELA plis skwat i lukautim nau Ororo Komyuniti skul long Jun Veli, Mosbi, bihain long em i op gen dispela wik long Mande Jun 22.

Raskol pasin i mekim na dispela bikipela skul long siti i bin pas inap long tupela wik olgeta. Skul i gat moa long 500 studen na 17 tisa.

Plis Komisina Peter Aigilo i bin kamap na toktok long ol papamama na tisa long skul long Sande Jun 21. Na tok strong olsem kain pasin bilong ol raskol i nogut. Na mas stap olgeta.

Em i tok plis bai putim was tasol em i askim ol papamama na pipel bilong Jun Veli eria long wok olsem plis. Na mekim wok painimaut long ol raskol pasin na ripot long plis. Na tok lukaut olsem "sapos yupela no wok bung wantaim plis bai ol kain hevi i go yet na skul bai pas olgeta".

Hetmasta bilong skul, Max Arau, i tok sapos raskol brukim na stil yet long skul, em bai skul i pas olgeta. Bikos dispela em i namba 3 taim bilong skul i pas long 1998.

Em i tok taim stil pasin i kamap, planti samting bilong skul na yusim long wok save bagarap. Em olsem tep wara, toilet pot.

Ol raskol save pulim tu beg bilong ol tisa meri.

Plis askim nau pipel long sapatim ol long wok painimaut long ol stil pasin i save kamap long skul.

## Pangu joinim Oposisen

VERONICA HATUTASI i raitim

LIDA bilong Pangu Pati na memba bilong Galp Chris Haiveta na lain bilong em i joinim Oposisen long dispela wik Tunde.

Dispela i kisim namba bilong Oposisen Pati i go antap long 41 taim 11-pela Pangu lain i joinim ol.

Pangu grup bilong Mista Haiveta i bin sindaun long hap sait bilong midel bens bens lain long palamen. Dispela i min olsem ol i stap long namel sia na ol i no sapatim gavman o oposisen. Pastaim tru Pangu i gat 32 memba tasol klostu long taim bilong nesenel ileksen las yia, ol bin-bruk wantaim papa bilong namba wan pati long kantri, Sir Michael Somare na sampela lain bilong em i lusim Pangu na go long oposisen. Narapela bikman, Sir Rabbie Namaliu i stap yet long gavman bilong Praim Minista Bill Skate na holim sia olsem Stet Minista na helpim praim minista taim narapela 11-pela i bin stap wantaim Mista Haiveta na sindaun long namel sia.

Mista Haiveta i bin holim sia bilong deputi praim minista na fainens minista long gavman bilong Mista Skate taim (Skate) i bin rausim em long sia long mun Disemba, bihainim ol toktok long Mujo Sefa tep. Taim Mista Skate i rausim Mista Haiveta, planti lain bilong em i bihainim em na stap olsem ol namel sia lain long gavman.

Taim Mista Haiveta i tokaut long grup bilong em i joinim Oposisen, em i tok pati i mekim dispela disisen bihain ol i glasim na skelim ol samting na sanap bilong ol long gavman na oposisen.

Bikipela samting Mista Haiveta i tok long en em insait long sikspela mun ol i stap olsem mainoriti pati, gavman i no givim ol mani long ranim gut wok bilong ol.

"Mipela i kiism taim tru taim gavman i no givim mipela mani long mekim wok long nesenel na provinsol level.

"Olsem na pati i bung na mekim disisen long go wantaim Oposisen," Mista Haiveta i tok.

Em i tokim gavman na oposisen olsem grup bilong em bai wok wantaim Oposisen an Mista Narokobi long lukim olsem gavman i mekim gut wok long ranim kantri na i no haitim wanpela samting.

Oposisen lida Bernard Narokobi taim em i welkamim Mista Haiveta na grup bilong em i bin tokaut long tupela memba bilong Pangu i kisim ol sedo ministri. Em long Abau memba Kilroy Genia husat em i givim Sedo Minista bilong Foren Afeas na Riniuwabel Risos taim Memba bilong Bulolo Samson Napo i kisim Sedo Ministri bilong Emploimen na Pablik Sevis.

I gat nau 102 nesenel palamen memba taim sevenpela i aut bihainim disisen bilong kot long disputet ritens.

# WANTOK

NIUSPEPA BILONG OL PNG STRET

P. O. Box 1982, Boroko  
Telepon namba: 325 2500  
Feks namba: 325 2579

## PE BILONG WANPELA YIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Ostrelia na Nu Silan	K115.00
Esia Pasifik na Japan	K150.00
Amerika na Yurop	K215.00



Bogenvil nius wantaim VERONICA HATUTASI

# Aweanes skul bilong ol refuji long Honiara

WANPELA grup long Bogenvil bai lusim provins long neks wik bilong karimaut aweanes progrem long Honiara, bik-taun bilong Solomon Ailans.

Dispela em long Bogenvil refuji husat i bin ranawe lusim ples long taim bilong hevi.

Provinsal Komyuniti Sevis minista na Siaman bilong Risetelmen na Rihabilitesen komiti Richard Lyons i go pas long 15 pipel husat i makim BTG, BRA/BIG, ol NGO grup, ol sief, ol sios na meri grup na ol teknikal opisa bilong BTG.

Wanpela memba bilong komiti, Mathias Pihei i tok AusAID opis long Honiara i givim K20,000 long ranim aweanes woksop we ol bai holim long Honiara, bik-taun bilong Solomon Ailans long neks mun. Woksop bai i stat long Julai 11 na bai go het long wanpela wik. Ol opisa bilong PNG Hai Komisin opis long Honiara, Red Kros na ol lain i makim ol grup long Bogenvil bai i ranim dispela woksop.

Long mun Julai, ol bai karimaut ol woksop na aweanes

progrem long Honiara, Gizo na ol arapela hap we ol Bogenvil refuji i stap long en.

Em i tok i gat 4-pela grup lain Bogenvil i stap nau long Solomon Ailans na em long:

- Ol dispela lain husat i bin sik na go long hap long kisim marasin. Ol dispela lain i gat bikpela laik long kam bek long ples;
- Ol paitman we i karamapim BRA na ol resistens grup. Planti long ol dispela grup i pret long go bek;
- Ol sumatin; na
- Ol dispela i raun raun nating

na go long hap. Ol lain i no wari tumas long go bek long ples.

Mista Pihei i tok bikos ol pipel i stap planti yia pinis long Solomon Ailans, ol no klia tumas long ol samting i kamap long Bogenvil. Planti i pret long ol wanwan grup, na ol pipel bilong ol yet. Bikos long ol samting nogut we i bin kamap long taim bilong hevi.

Olsem na ol mas karimaut ol aweanes wok long klianim na stretim tingting bilong ol bipo ol i go bek long ples.

# Yesa nau long komiti lukautim Arawa

PETER SOHIA i raitim

GAVMAN i tokorait pinis long wanpela komiti we bai lukautim Arawa nutrel eria insait long Sentrel Bogenvil. Ol i kolim dispela komiti long Arawa Dimiliterais Nutrel Son (ADNZ).

Komiti ya i gat long en ol lain bilong nesanel gavman, BTG, BRA/BIG na komyuniti long Arawa i redim ol wok nau long lukautim dispela eria long Arawa we i kamap aninit long nutrel eria.

Ol lain i kamap wantaim wanpela agrimen we bai lukautim Arawa niutrel eria tasol ol lida bilong ol grup we Lincoln na sispai Agrimen i karamapim ol i mas tok oraitim em yet.

Agrimen i tambuim ol sekyuriti fos memba, plis mobail skwat lain, BRA na grup bilong ol resisten paitman long noken go insait long eria we i stap aninit long nutrel eria.

Mak bilong nutrel eria i stat long Wara Kaperia na Baroku klostu long Arko Motors. Agrimen i wa bel tu long olgeta ami na plis riot skwat i mas muv i go long Loloho.

Bogenvil Trensisenel Gavman bai lukautim ol sevis long sait bilong edministresen insait long nutrel eria taim BTG, BIG na nesanel gavman bai i lukautim ol helt sevis.

Operesens komanda bilong PNG Difens Fos long Bogenvil, Leftenen Kenel Michael Tomalanga husat i bin stap insait long wanpela bung long ples Paruparu-las wik i tok ol bai surukim Arawa Fil haus sik i go long

Loloho taim ol i muv bikso em i hap bilong ami yet. Tasol pablik i ken kisim yet sevis long Loloho. Em i tok liklik lain woklain bilong fil haus sik bai i stap bek long Bogenvil long lukautim sevis.

PNG plis fos bai lukautim lo na oda insait long nutrel eria wantaim helpim bilong resistens na BRA memba.

Long wankain taim tu, ol lain husat i stap insait long Arawa niutrel eria komiti i singaut long BRA/BIG lida Joseph Kabui na Sam Kauona i hariapim wok long kamapim bel isi pasin insait long Sentrel Bogenvil.

Linus Konukung, man i makim saut Bogenvil, James tanis na Peter Sohia i makim not Bogenvil i bin mekim singaut insait long bung long ples Paruparu las wik.

Mista Tanis i bin tok amamas long ol pipel bilong Bana, not na saut Bogenvil long wok wantaim ol sekyuriti fos, BRA na resistens lain bilong painim gutpela sindaun long Bogenvil.

Em i tok ol pipel bilong ol dispela eria i putim planti hatwok long wok bilong bringim bek gutpela sindaun na tu long bringim bel isi na sekan pasin.

Tasol embin tok ol pipel long sentrel i go het long gat pret pasin long wanpela arapela na sampela i laikim bai ol ami i stap bek long Arawa niutrel eria.

Mista Kabui i wanbel long salen na em bin tok em bai lukluk long en na askim Primia Sinato long givim helpim wantaim mani long karimaut ol progrem bilong bringim bek bel isi na sekan pasin.

# Bogenvil refuji long Honiara ken go bek nau long asples

MOA long 2000 Bogenvil refuji long Honiara bai bungim gen ol famili na wantok em ol no bin bungim long 10-pela yia samting.

Nau yet i gat ol wok redi long kisim ol pipel bilong Bogenvil husat i lusim ples long taim bilong hevi na ranawe go stap long Solomon Ailans.

Dispela plen bai karamapim tu ol pipel husat i stap insait long ol kea senta long Bogenvil yet, na tu long ol arapela hap bilong kantri.

Wanpela ripot Wantok i kisim long Bogenvil i tok ol bin kirapim wanpela komiti bilong lukautim dispela samting bihain long Lincoln Agrimen long Nu Silan long mun Janueri long dispela yia.

Provinsal Minista bilong Komyuniti Sevis, Richard Lyons, i siaman bilong komiti ol i kolim long Ripatriesen na Rihabilitesen Komiti.

Hap 11-5 bilong Lincoln Agrimen i tok-tok long kisim bek na stretim rot bilong ol Bogenvil pipel husat i stap long Honiara, ol kea senta insait long Bogenvil yet, na ol dispela husat i bin ranawe na stap nabaut long PNG.

Ripot i tok komiti i kisim pinis mani long karimaut dispela wok. Ol grup olsem AusAID, Nu Silan Hai Komisin na Bogenvil Trensisenel Gavman i givim mani long dispela projek. Mani mak inap long K 9 milien.

Ripot i tok bihain long ol aweanes progrem na ol pipel i redi, ol bai salim sip long kisim ol lain long Solomon Ailans long pinis bilong mun Ogas.

I gat tripela kea senta olgeta long Honiara, we ol Bogenvil refuji i stap long en.



**BIAB INSAIT LONG PALAMEN**

BIABIA I MEKIM STRONGPELA TOKTOK LONG TAMBUIM OL PIKSA NOGUT...

MISTA SPIKA! IGAT KAIN KAIN PIKSA NOGUT IPULAP LONGI PAJ.G! TAMBUIM DISPELA RABIS PASIN!

MI SAVE, I GAT SAMPELA OL MINISTA TU I INVOLV LONG OL DISPELA PIKSA NOGUT! PAINIM OL DISPELA KORAPT MAN NA LOKIM OL!

ER... MISTA SPIKA...

NAU WANPELA MINISTA SANAP NA APIM FOTO BILONG BIABIA NA SOIM OLGETA MINISTA NA TOKTOK...

YES, MISTA SPIKA! MI GAT EVIDENS OLSEM BIABIA TU I TEK-PAT LONGI PIKSA NOGUT.

AYOO!! YUKSISIM FOTO WE?!

• Ol meri Bogenvil husat i bin ranawe long ples long taim bilong pait nau stap olsem refuji long Solomon Ailans.

# Ol nupela plis lukautim pipel na ples

OL nupela oksileri plis greduet long Arawa tupela wik i go pinis i helpim nau wantaim wok bilong bringim bek gutpela sindaun long Bogenvil.

Wantok i kisim ol toktok long Arawa olsem ol yangpela manmeri plis i wok insait long ol wan wan Vilij Kaunsil ol Siefs eria insait long sentrel Bogenvil long karimaut aweanes progrem we i sut long lo na oda na gutpela sindaun insait long komyuniti, distrik na provins.

Ripot i tok sindaun long Arawa i orait maski ol liklik meknais i kamap bikos olgeta taim bai i gat ol sampela bikhet lain i stap insait long komyuniti long bagarapim gutpela sindaun. Ripot i tok ol lain i wokim bikhet pasin em ol dispela we i save dringim hombru.

Ripot i tok ol skul, helt sevis i wok long op isi isi insait long Sentrel Bogenvil, tasol wanpela hevi em

mani i sot long baim ol samting bilong yusim long skul na tu bilong sanapim ol nupela klasrum, ol haus tisa na ol arapela samting moa we ol i laikim long skul.

Ripot i tok ol sekyuriti fos memba i wok long lusim Arawa is isi, bihainim disisen bilong gavman long mekim Arawa i kamap wanpela niutrel eria.

Ripot i tok tu olsem Sentrel Bogenvil i kirapim nupela distrik pis komiti long kisim ples bilong olpela Not Nasioi Pis komiti, we i bin makim not Nasioi eria tasol.

Nupela komiti i karamapim olgeta eria insait long distrik na siaman em fabian Tapman bilong Eivo/loro eria. Namba tu bilong en em Paul Kanama bilong Koromira eria.

Olgeta sief bilong Sentrel Bogenvil i stap insait long dispela komiti, ripot i tok.

long lukim ol ples na kalsa bilong ol Nu Ailan pipel insait long faivpela mun stap bilong ol long provins.

Wantaim wanpela sip bilong ol daiva, Paradise Sport we i bin kamap long Nu Ailan tripela wik i go pinis, 22 daiva bilong ol kantri olsem Australia, Nu Silan, Amerika, Inglan na ol arapela kantri long Yurop i stap nau long Kavieng bilong go daiv long ol solwara bilong ol ailan long Nu Ailan provins na kisim piksa long ol rif na ol samting i stap insait long solwara.

Administrata bilong Nu Ailan provins Kenel Lima Dataona i tok

projek we dispela kain samting i givim.

Kenel Dataona i tok olgeta 16-pela kru long dispela daivsip em ol PNG lain. Ol i kam long Milen Be provins bikos sip i bin go pastaim long hap na stap long faivpela mun long daiv long ol nambis na ailan na kisim piksa wantaim.

Kenel Dataona i tok wanpela man Australia, Mike Ball i papa long disepla sip na em i beis long Kens, Australia.

Nu Ailan Turis Biuro na ol risos ona i bin sainim wanpela agrimen wantaim ol daiv operata long ol samting we bai ol i mekim

long ol wan wan ailan we ol daiva i go long en bai putim ol tumbuna singsing danis na givim sans long ol ausait lain i lukim kalsa bilong ol.

Em i tok ol daiva i save slip long bot tasol long 14-pela de, ol i save daiv long ol ailan, lukim ol naispela ples na kisim piksa long ol rif na pis.

Em i tok Nu Ailan provins i gat ol naispela na gutpela ailan, ol rif na gutpela ples long ol turis long lukim na ol daiva i mekim gutpela disisen long makim provins olsem wanpela ples bilong ol long go na stap long en. Sip bai i stap long Nu Ailan long 5-pela mun.

Maski distrik i gat sampela ol naispela samting na ples we ol turis i save go lukim, gavman i no wokim wanpela gutpela samting long bringim sevis i go long hap bilong sevim ol pipel insait long dispela taun na distrik.

Sampela long ol naispela samting we Talasea i gat nem long en em, rif we planti lain i save long en em Emma Rakaru Komolulih rif. Rif ya em i gat nem olsem bikpela andawata botanikol gaden long wol, ol masin na ol samting ol i lusim bihain long namba tu bikpela pait i stap long pablik long lukim, ol hatwara, planti naispela ailan na raunwara Lake Dakataua we i no longtaim i go pinis, ol i painim ol animol olsem ol dainaso. Walindi risot planti turis i save go long en i stap tu long Talasea eria.

Ripot i tok nesenel na provinsol gavman i tanim baksait long Talasea na em i kamap olsem wanpela ples

long taim ol bai pinisim ol.

"Provinsol gavman i save mekim planti toktok long karimaut ol wok developmen insait long ol ples tasol em no wokim dispela long Talasea," ripot i tok.

Ripot i tok long taim pibo koloniel gavman bilong Australia i stap na lukautim PNG, Ol pipel bilong Talasea i save kisim gutpela sevis. Rot we koloniel gavman i bin putim long nau i bagarap bikos gavman bilong nau we i karamapim nesenel na provinsol, i no wokim wanpela samting long stretim.

Ripot i tok Talasea i no kisim gutpela sevis bikos ol i kisim bek ol helt, edukesen na ol arapela sevis i go long Kimbe.

Ol ples lain i mekim ol gaden na ol arapela wok long lukautim ol yet, sindaun long famili bilong ol na environmen, ripot i tok.

## Hailens haiwe no seif long draiv long nait

SAPE METTA i raitim

HAILENS haiwe rot namel long Morobe na Isten Hailens i no moa seif nau long draiv i go i kam long nait.

Plis i mekim dispela tok lukaut bihain long sampela trabol man i wok long stapim, hensapim ol ka na trak na mekim stil pasin.

Isten Hailens polis i tok sampela holdap pasin wantaim gan, stil pasin na pasin bilong bagarapim o reipim o meri i kamap pinis long bikpela haiwe rot long nait long ol wik i go pinis.

"Dispela pasin i kamap ken, na

luksave long dispela kain pasin bai kamap, mi bin mekim toksave pinis long ol pablik long i noken draiv long haiwe long nait" Provinsal Plis Komanda Sief Inspekta Buckley larume i tok.

Em i mekim dispela toksave bihain long em i bin tokaut na mekim ripot long 20 manmeri husat i bin kisim taim nogut taim ol i lusim olgeta mani na kago bilong ol long wanpela holdap pasin namel long hailens haiwe rot. Long sem taim tu ol dispela sem raskol lain i bin holim pasim 4-pela meri na bagarapim ol.

Inspekta larume i tok haiwe rot em i seif tasol ol pablik i mas tingting gut na i noken larim ol yet long subim het i go insait we

ol i ken bungim na pain trabel long han bilong ol raskol.

Ol trevolas i ken abrusim ol dispeal trabol pasin sapos olgeta i pasim tok na ron wantaim (konvol) we bai i mekim hat long ol raskol i holim ol ap.

Mista larume i tok, em i laikim ol man na meri husat i save ron igo - i kam i mas save olsem em i no seif long nait taim ol i ron long dispela hailens haiwe rot.

Hailens Divisinol Plis Komanda, John Wakon i sapotim tu tok lukaut bilong Mista larume. Em i tok dispela tok lukatu bilong Komanda larume i gat bikpela mining long sait bilong sevim laip na ol propeti.

## Isten Hailens redio stesin mas op gen, ol lida tokaut

BIKPELA toktok na askim nau i wok long kamap na go het yet long KBK redio stesin long Isten Hailens mas op gen. Dispela em bihain long em bin stopim brodkas inap moa long tupela mun nau.

Redio Isten Hailens i pas moa long tupela mun na i mas kisim samting olsem K200,000 long go het. Na karim aut komyunikesen sevis i go long ol pipel long rurel eria.

Mamba bilong Henganoffi na Minista bilong Lens, Viviso Seravo, tok em i sapotim ol komyuniti lida na pipol long singautim Provinsol Gavman long givim mani na redio KBK i mas op.

"Olsem wanem tru bai ol pipol long ol liklik distrik long Isten Hailens i ken harim na luksave long ol developmen insait long kantri, na tu long wol sapos redio stesin i pas na i no inap mekim ol wok brodkas. Bikos i nogat mani bilong sapotim ol dispela wok", Mista Seravo i tok.

Em i tok long poket bilong em yet, em i bin givim K4,000 las yia long stesin go het long wok brodkas. Na em i laik lukim tu ol arapela nesenel memba

bilong Isten Hailens i mas givim han na sapotim dispela redio stesin long wok.

"Mi singaut strong tu i go long Gavana Peti Lafanama long kamap hariap na givim sapot long Redio Isten Hailens," Mista Seravo i tok.

Em i tok em i luksave na amamas long wok redio i save kamapim. Bikos long taim em yet bin i stap long skul redio i bin helpim na i wok long helpim ol arapela skul mangi yet long kamapim developmen long kantri.

Redio i bin na bai i go het yet long pilgaim bikpela pait long laip bilong ol rurel komyuniti, olsem na fanding bilong sapotim wok bilong redio i mas kamap wan tu tasol, Mista Seravo i tok.

Bikpela Bisnisman Sir Danny Leahy i bin harim hevi bilong redio KBK. Na bihain long em i lukluk raun long ol masin na opis, em i askim long ol politisian wantaim gavana long bungim moni na opim bek redio KBK.

Nau yet tupela sinia helt eduketa long provins i singautim tu ol lida long givim moni na opim bek redio KBK.


Teknikol edvaisa bilong ol kainkain sik nogut, Jackson Apo, na provinsol Helt eduketa, Yamjuwe Lesse, i bilip olsem planti pipol long hauslain nau i sindaun long mak we ol sik nogut bai kilim ol dai. Bikos ol i no save long was long skin na laip bilong ol bihain long Redio KBK i pas.

Gavana Lafanama na gavman bilong em i makim K50,000 tasol long provinsol baset long helpim Redio KBK i kirapim bek wok brodkas. Tasol nau yet provinsol gavman i no givim dispela moni long KBK i ronim wok. Olsem na stesin i stap pas yet.

## Ol Loniu laik bel isi wantaim Pak Ailan pipel

OL PIPEL bilong Loniu husat i stap long Lorengau taun long dispela wik i bin prisenim wanpela petisen i go long Pis na Gutoda komiti long askim ol Pak ailan pipel long kamapim bel isi pasin wantaim ol bihainim dai bilong wanpela yangpela man bilong Loniu tupela wik i go pinis.

Lesley Pok husat i gat 20 krismas i bin dai bihainim pait long fan resing danis bilong Los Negros



### Em stail stret ya!

• Ol lain bilong skul bilong Ekt long Univesiti i mekim wanpela drama dens ol i kolim long "Dancing Flames" or "Paia i wok long danis".  
Foto: Ivan Bayagau.

netbol Asosiesen we ol bin holim long Chauka ba long Lorengau.

Deputi Provinsol Plis Komanda Lawrence Tiyonnei i tok plis i holim pasim na sasim pinis wanpela saspek long dispela birua. Ol i holim pasim narapela tripela gen. Tasol ol no autim nem bilong saspek bikos ol i ting dispela i ken kamapim bikpela hevi moa.

Em bin tok pait we manki i dai

long em i bin kamap long kros long meri.

Inspekta Tiyonnei i tok wanpela stilpasin i bin kamap long las Sande we sampela lain i bin brukim opis bilong KBK, wanpela papagraun kampani bilong wes kos Manus na stilim tupela televisen set. Plis i painim yet ol lain i karimaut dispela stil pasin long bikmoning Sande.

# Kabinet rausim Morobe edukesen bod

JAMES KILA

MORobe provinsal eksekutiv kaunsil (Sam Sewe) long dispela wik i saspending provinsal edukesen bot (PEB).

Dispela em bihain long PEB i no bihainim ol disisen bilong nesenol na provinsal gavman long givim aut ol skul fi subsidi.

Provinsal Edukesin siaman, Basuk Erewiong insait long wanpela sabmisin i go long Sam Sewe las wik i tokaut long saspending olgeta bod memba.

Mista Erewiong i sasim ol bikos provinsal edukesen bod i go long

laik bilong en yet na senisim prais bilong skul fi insait long provins.

Insait long wanpela pepa we i bin goaut long ol skul insait long provins, mak bilong skul fi i sta olsem K20 long elementari i go praimeri skul na K50 em bilong ol vokesinol i go long provinsal na sekondari skul.

"PEB i no bin bihainim toktok we i stap long ol pepa we i tokaut long ol skul fi," Mista Erewiong i tok.

Em i tok olsem i no long taim i go pinis provinsal edukesen bod i apim projek fi long ol skul long K20 i go K50 na bihain K50 i go K90.

"Dispela pasin i givim bikpela hevi tru long ol papamama husat i stap long ol ples o rurel eria husat i bin painim hatpela taim tru bihain long bikpela san long 1997," Mista Erewiong i tok.

Insait long moni mak bilong em em K1,552,743 insait long sek namba (Chq No:83661) we Nesenel Gavman i givim olsem skul fi subsidi bilong fes-kwata long 1998. PEB i peim tasol K1,411,871. Hap moni bilong dispela fes-kwata we i stap na ol i no peim yet em K140,872.

Sam Sewe i givim PEB 60-de saspensin na tu taim long makim ol nupela memba.

# Okapa memba i no wanbel long Lafanama

MEMBA bilong Okapa, Castan Maibawa, i gat bikpela tingting nau long luksave olsem gavana bilong Isten Hailens, Peti Lafanama, i save lusim provins na i go aut tumas. Na tingim tumas ol wok bilong nesenel Palamen na i no save i gat taim bilong ranim provins bilong em yet.

Mista Maibawa i tok ol pipel bilong Isten Hailens i nidim tru gavana long i stap long provins na sevim ol pipel husat i makim em long kamap lida bilong dispela provins.

Em i tok gavana i mas stop long askim bilong Praim Minista Bill Skate long i go daun na sindaun long kainkain liklik komiti miting nabaut long Mosbi siti. Wanpela long ol em bai-patisen komiti bilong ICAC.

Em i tok gavana i no apoinim ol memba bilong Palamen na ol presiden bilong Lokol Level gavman long i go insait long kainkain komiti aninit long nupela ogenik lo long provinsal na lokol level gavman long kamap na ronim provins

Nau yet Isten Hailens i stap long han bilong deputi gavana husat i nupela long politik long ronim provins. "Planti long mipela i no i stap long mak bilong provinsol level", Mista Maibawa i tok.

Memba ya i tok em i bin mekim wanpela askim long gavana long bungim ol memba bilong provins long go insait long komiti. Na ol i ken bungim het wantaim long ranim provins. Tasol dispela gutpela tingting i popaia na abrus. Bikos gavana i no laik harim, skelim na bihain dispela gutpela tingting.

# Goroka yuni studen laikim banis waia

Ol sumatin long Yunivesiti bilong Goroka Kempas i givim bos bilong ol wanpela mun long stretim hevi bilong ol.

Ol sumatin na studen lida i kamap long dispela tingting taim ol i wanbel long go bek long skul bihain long ol i lusim klas inap wanpela wik na pulim kros wantaim bos bilong yunivesiti.

Presiden bilong Studen Ripresentativ Kaunsil, Simon Gesip, i tok ol sumatin i wanbel long go bek long skul. Tasol ol bai lukluk sapos Yunivesti Administresen bai stretim ol askim i gat hevi bilong ol.

Mista Gesip i tok wanpela mun em inap taim bilong Vais Jansela na Yunivesiti Kaunsil i lukluk na stretim ol hevi we ol sumatin i kamapim.

Ol sumatin i bin pasim skul na kamapim toktok taim planti hevi i kamap long Yunivesiti Kempas. Na mekim ol na ol tisa i no sindaun gut long wok na stadi. Ol i laikim yunivesiti i putim strongpela sekyuriti long skul eria, kamapim gut redio wallis insait long ol haus bilong ol sumatin.

Vais Jansela Dokta Mark Solon i bin tokaut long risain long wok taim ol sumatin i bin givim em sotpela taim tasol long stretim ol dispela hevi. Tasol em i holim opis yet bihain long ol sumatin i skruim taim bilong ol.

Dokta Solon i tok Yunivesiti bilong Goroka i wankain olsem olgeta arapela han bilong gavman we i wok long painim hevi long mani long kamapim gut olgeta wok bilong en. Tasol em i tok dispela hevi bilong mani i no daunim em long wok. Na em i traim hat long ranim yunivesiti long wanem liklik mani em i gat.

Em i promis long lukluk long hevi we ol sumatin i kamapim.

# Imbongu skul kisim K50,000

**MATHIAS MALE i ratim**

TOP-ap praimeri skul insait long Imbongu Ilekortet i kisim K50,000.

Skul ya me Kaupena komyuniti skul em i wanpela olupela skul save stap long Imbongu distrik long Sauthen Hailens provins. Skul i bin stat long 1950 we ol Ameriken misineris i bin statim ananit long mama sios em Papua Niugini baibel Institute OPNG Baibel sios.

Hetmasta bilong Skul Mista Taka Kepa tok memba bilong Imbongu na namba 2 oposisen lida Mista Peter Peipul i bin i bin aloketim K50,000 i go long skul ya taim memba i skelim moni we Sauten Hailens 1998 provinsel baset aloketim K2.8 milien kam long Imbongu ilektoret.

Mista Peipul na ol kaunsel presiden ol i skelim K2.8 milien

bilong ilekstoret bilong ol na K50, 000 i go long kaupena Top-ap skul.

Mista Kepa tok em i kisim dispela K50,000 sek ya long Tunde 17 long dispela wik yet. Mista Kepa i tok em i gat bikpela hamamas na tok tenkyu i go long Mista Peipul olsem, insait long 22 yia Indipendens nogat wanpela Imbongu memba save givim dispela kain mani tasol ol skul bod o gavons wantaim ol i hamamas bikos Mista Peipul i man tru bilong Imbongu Ilekortet long luluk long ol kain hevi na wari long ilektoret bilong em.

Mista Kepa tok ol bai yusim dispela mani logn wokim klasrum bilong ol Top-ap gred seven na eight na tu ol bai mekim ol arapela wok tu long kirapim skul ya wantaim dispela mani.

"Kaupena komyuniti skul edukesen bodi makim top-ap skul insait long dispela yia 1998 yet," Mista Kepa i tok.

# 1998 COMMONWEALTH GAMES

## OL BIKPELA PRAIS BILONG WINIM EM:

- \* Tupela tiket bilong lusim MOSBI na LAE Ples balus na go long Kuala Lumpur na kam bek.
- \* Slip 8-pela nait long hotel rum we yu ken serim wantaim pren bilong yu, em spona yet bai baim.
- \* Wantaim K1,000 mani bilong spenim.
- \* Na tu bai yu kisim Tupela Fri Komonwel Gems hanwas.

## OL ARAPELA PRAIS

- \* 2,000 Milo Hanwas

## OL RULS BILONG BIHAINIM

1. Olgeta manmeri na pikinini bilong PNG ken stap insait long dispela resis. Na ol wokman/meri bilong Nestle na famili bilong ol bai nogat, wantaim ol wokman/meri bilong ol ejensi bilong Nestle.
2. Bai gat tupela wina tasol bilong bikpela prais. Na tu bai gat wanpela wina tasol long wanpela dra. Dra bai kamap long EMTV long ol dispela taim: Jun 12 na Julai 31 long 8 klok nait.
3. Wina bilong bikpela prais bai kisim toksave long leta. Nem bilong bikpela prais wina bai kamap tu long Post Courier na The National Niuspepa
4. Ol arapela wina bai kisim toksave long leta.
5. Ol wina bilong bikpela prais mas saim aidi kat na paspot long kisim prais.
6. Ol wina i no inap les long prais, na askim long kes mani.
7. Nestle ino inap kisim sapos leta i kamap leit, o i no go stret long ol wina.
8. Yu no inap senisim prais bilong yu.
9. Sapos i gat hevi, ol lain i promotim dispela resis bai mekim faino disisen. Olsem na algeta entri bai kamap propeti bilong promoti bilong resis.
10. Sapos wanpela pikinini i kamap wina bilong bikpela prais, pikinini mas kam wantaim papa o maaao wanpela bikpela famili memba.

\*Ol prais bilong winim bai yu kisim olsem mipela i edvetaisim.

## EM I ISI LONG JOINIM RESIS.

Ratim tasol nem na adres bilong yu long beksait bilong wanpela

Milo lebel na postim i kam long:

Milo Commonwealth Games Promotion

Locked Bag, Baroko, NCD

o filim tasol wanpela entri fom na salim wantaim Milo lebel o Sapek na putim igo insait long Red Nestle Entri boks long stua i sapatim dispela resis.




NEM: \_\_\_\_\_ KRISMAS: \_\_\_\_\_

ADRES: \_\_\_\_\_

TELEPON: \_\_\_\_\_



## OL RUL BILONG KARIM DIWAI KROS BILONG YU



FRANK MIHALIC i raitim

kruse ya i mas skulim yumi.

Ol i stori long wanpela man, oltaim em i save komplem long diwai kros em i mas karim. Em i komplem, komplem na God i tokim em olsem, "Orait, yu kam wantaim mi. Bai yumi-tupela i go long woksap we ol i save wokim olkain diwai kros. Hia bai yu ken painim wanpela i pas gut long yu.

Orait, tupela i kamap long woksap na i go insait. Na man ya i tekewe diwai kros long solda bilong em na i sanapim em klostu long dua.

JISAS i bin tok olsem: long olgeta de yumi mas karim diwai kros bilong yumi na bihainim em. Lukim Luk 9:23.

Diwai kros ya em i trik nem bilong olkain samting yumi no laikim. Olsem: pen na wari na sori na trabel na hatwok na olgeta samting i sol long yumi. Yumi olgeta wan wan i mas karim ol dispela kain diwai kros. Olsem na i gut yumi kisim sampela tok stia long pasin bilong karim ol na bihainim Jisas.

Namba wan wari bilong yumi em i hia: yumi save ting God i bin givim diwai kros i hevi tumas long yumi. I luk olsem ol arapela pipel i gat wanpela i no hevi; tasol bilong yumi yet, em i hevi moa. Tasol dispela i no tru. God i no laik ba diwai kros i krungutim na bagarapim na pinisim yumi. Nogat. Em i laik bai yumi karim gut na yumi win, na

Nau em i raun nabaut insait long woksap na i traim kain kain diwai kros. Tasol, sore, olgeta wan wan i no pas stret long em; sampela i long-pela tumas, sampela i hevi tumas. Man ya i raun insait long woksap na i pinisim olgeta diwai kros, tasol em i no painim wanpela em i laikim. Las tru em i kamap long dua bilong go ausait, em we God i sanap i stap i wetim em, na em i painim wanpela las diwai kros i stap. Em i litimapim em na wokabout wantaim em na traim sais na hevi na ol samting bilong em na em i laikim. Dispela i pas stret long em. Orait, nau em i kisim i go. Na God i poromanim em na tupela i go ausait gen. Na God i lukluk long em na i lap na i tokim man ya, "Mi amamas long lukim yu laikim dispela diwai kros ya em i dis-

pela yu yet yu bin karim i kam."

Dispela stori i min olsem: God i save tumas long yumi wan wan, na em yet i save wanem diwai kros i pas stret long yumi. Bilong dispela na Jisas long Gutnius i tok olsem: "Yu mas kisim diwai kros bilong yu" (L 9:23) na i no bilong narapela man/meri.

Sampela taim i olsem yumi sanap arere long rot we Jisas i karim diwai kros bilong em i kam long Gut Fraide; yumi olsem ol meri Jerusalem i lukim em i kam longwe. Sampela taim yumi lukim diwai kros i kam longwe yet na yumi no inap ranawe. Sampela taim yumi lukim diwai kros i kam longwe yet na yumi no inap ranawe. Ating yu mi mas go long wok, o yumi mas go long skul, o yumi mas go long dokta o haus sik, o yumi mas go long kot. Dispela em i diwai kros i wetim yumi long dispela de.

Long ol dispela kain taim Jisas i wokabout poromainim yumi; em i sambai. Long taim em yet i bin karim diwai kros bilong em, em i larim wanpela man i helpim em. Yumi tu mas larim Jisas i helpim yumi. Em yet i bin tok long Metyu 11:28 olsem: "Husat i karim bikpela hevi, em i mas kam long mi na bai mi givim malolo long em."

Harim: diwai kros i gat tupela plang: wanpela long-pela na wanpela sotpela. Yumi mas karim sotpela tasol; na Jisas bai karim longpela.

## Wanpela memba mas makim sios long Palamen, Kaiabe

I GAT askim nau olsem wanpela memba i mas makim ol sios long Palamen.

Dispela askim i kam long Memba bilong Komo-Magarima na Sedo Minista bilong Jastis na Indastrel Rilesens, Alfred Kaiabe.

Memba Kaiabe tok em bai autim dispela tingting long bung bilong Palamen long dispela mun, em bin stat long Mande Jun 22.

Memba tok em bai askim long Palamen i mekim senis long Seksen 101 na 102 bilong Mama lo bilong kantri. Na kamapim wanpela moa sia long Palamen, we i mas go long ol sios.


Em i tok dispela nominet memba i mas siaman bilong Nesenel Kaunsil bilong ol Sios long Papua Niugini.

Em i tok ol sios i mekim bikpela wok long developmen bilong dispela kantri. Dispela i no long bilip long wok bilong lotu tasol, nogat. Em long ol developmen wok tu olsem bilong ol skul, ol koles na yunivesiti.

Em i tok antap long dispela, ol skul i helpim tu long wok bilong wokim na ronim ol haus sik na helt senta, wantaim ol ogenaesen grup o bodi bilong helpim na lukautim ol trangu pipel bilong kantri.

Em i tok bikpela samting mas gat luksave em ol sios i yusim mani bilong ol yet. Na wokhat tru long helpim developmen dispela kantri, na ol pipel bilong en.

Em i tok opis bilong ol minista husat em ol sios i kam aninit i no mekim gutpela wok long sapotim ol sios. Na dispela em i tru. Bikos long 5-pela yia i go pinis, singaut i kam long ol sios long gavman mas helpim ol. Na givim sam-



• Alfred Kaiabe, MP, Komo Magarima.

pela mani long ol i strongim na karim go het wok bilong ol.

Em i tok bikos em i lukim dispela, em yet i go pas nau long toktok strong, na lukim olsem gavman i luksave na wok bung wantaim ol sios long developmen bilong kantri.

Em i tok em i sponsarim kamap bilong Nesenel Kaunsil bilong ol Kristen Sios Ekt, we wanpela bod bai lukautim na ronim. Ol bod memba em ol bikpela nem sios bai makim. Na siaman bilong Nesenel Kaunsil bilong ol Sios bai kamap siaman bilong dispela bod. Na siaman bilong Nesenel Kaunsil bilong ol Sios bai kamap nominet memba long Nesenel Palamen.

Dispela tingting i bihainim wanpela mosen em Palamen i oraitim long bung bilong mas 27, 1997.

## Helpim ol trangu bilong tumora

TRANQU Sevis, wanpela Non Gavman grup i stap long Kundiawa insait long Simbu provins i save helpim ol pikinini we papamama bilong ol i dai, ol dispela we ol papamama i nogat samting na i no inap lukautim ol. Grup i lukautim ol dispela lain long kisim gutpela skul na bihainim kisim wok.

Sampela ol lain we ol i lukautim i kisim pinis wok wantaim gavman na praiwet sekta long kantri.

Ogenaesen i laik skruim sevis bilong em moa na ol i tingting long helpim ol lain husat i kisim bagarap long taim bilong bikpela san, guria, bikpela ren, graun bruk na ol kain birua olsem.

Ogenaesen i kisim hap graun long taun bilong Kundiawa, Kagai Evanjelikol Luteran Sios seket bilong karimaut sampela projek bilong pulim

mani long en.

ELC/PNG i luksave long wok bilong Trangu Sevis na i givim ol hap graun ya.

Long wanpela ripot, grup ya i laik kirapim sampela projek tasol ol i sot long mani. Na ol i askim ol Kristen brata na susa insait long kantri bilong givim helpim we bai go gen long lukautim ol trangu lain.

Ripot i tok i gat sampela taim long laip bilong yumi we yumi wan wan bai kamap trangu na i moabeta long helpim ol dispela kain grup we i helpim ol trangu.

Hevi bilong trangu long wanpela we em i hevi long no kisim edukesen, moa yet long ol dispela husat i no kisim ewdukesen o ol dispela we i kisim tasol bikos long sampela kain hevi, ol i kamap trangu lain.

## Mama Geamsau grup askim long moa yangpela mama bilong Luterans sios

ASKIM i go nau long ol yangpela mama bilong Luteran sios long Gerehu, na tu long ol arapela hap bilong Mosbi siti, long joinim ol Mama Gamsau grup.

Dispela em grup bilong ol mama long Gerehu, husat i memba bilong Emmanuel Luteran sios long Gerehu yet. Na askim ya i kam long het meri bilong grup, Gesau Nali.

Misis Nali i tokim Wantok long liklik bung bilong ol las wik, Sande Jun 21 olsem nau em nogat planti yangpela meri i soim laik long joinim grup bilong ol

Mama Gesau. Na em pilim olsem dispela i no gutpela tumas.

Em i tok planti yangpela mama i bungim hevi. Na em i gutpela long ol i jritim kain grup olsem long kisim helpim na sapot long ol arapela mama.

Olsem na em i askim ol yangpela mama bilong sios long Gerehu long luksave long dispela. Na joinim Mama Gamsau.

Em i tok sapos moa yangpela mama i joinim Mama Gamsau, dispela bai strong stret wok bilong grup. Na dispela bai strongim ol famili na yut grup.

Em i tok ol yut grup insait long siti tu i seksek na i no ron gut. Na askim olsem namba wan samting em sapos ol mama i no strong, em bai ol yut i pundaun. Bikos mama em bikpela samting. Na kain grup bilong ol mama i mas stap long holim pasim strong sosaiti long groa na stap gut wantaim amamas.

Insait long bung bilong mama Gamsau long las wik Sande, ol i tok gutbai long wanpela memba bilong ol. Nem bilong dispela lapun mama o memba em Nana Napenak. Na em bai go bek long ples bilong em long Morobe.



## Tok Sori

I kam long ol wokman bilong Len Transpot Divisen  
Opis bilong Transpot

Mipela i sori na wari tru long harim indai bilong  
**Mista Francis Solien,**  
Fes Asisten dairekta, LenTranspot Divisen.



Mipela i salim tok sori i go long meri bilong em Trista na ol pikinini,  
Rose, Franzuer, Tamara, Frazer na ol famili na pren bilong  
Mista Francis Solien.

Yumi tok tenk yu long God papa olsem i gat laip oltaim i stap  
bihain long yumi dai. Ol dispela lain husat i soim laik na mekim  
strepela wok bilong God bai painim amamas na bel isi long taim  
ol i kirap gen long heven.

Yumi pre long Francis Solien i painim bel isi.

# PNG ken planim rais, Laimo tok

PAPUA Niugini ken planim rais bilong em yet, Memba bilong Saut Bogenvil, Michael Laimo i tok.

Na salens i go nau long gavman long sapatim wok bilong planim na salim rais insait long kantri.

Memba Laimo i tok gavman bilong tude na bipo i mekim planti tok long strongim ol rais fama na indastri long kantri bai kamapim rais bilong em yet. Tasol ol dispela toktok i no karim kaikai. Mista Laimo i tok gav-

man i save olsem PNG inap long groim rais bilong em yet. Na i nogat nid long baim rais long narapela kantri na tromoi bikipela mani long olgeta yia.

Em i mekim dispela toktok bihainim tingting bilong gavman long

baim rais long kantri Tailen.


"Gavman bilong pas-taim i bin save olsem PNG inap long groim olgeta rais we em i nidim long lukautim ol pipel bilong em.

"Ol saveman bilong Saut Korea, Taiwan na Saina husat i stap long kantri na helpim ol pipel long ol rais projek i wok long autim wankain toktok olsem kantri i ken groim rais bilong em yet.

"Tasol ol bikman long Waigani i no harim ol toktok na tude, PNG i wok long baim rais ausait long kantri yet. Tude, rais i kamap olsem namba wan kaikai bilong ol famili long PNG, winim ol arapela kaikai," Mista Laimo i tok.

Em i no wanbel long pasin we Agrikalsa Minista Tukape Masani i wokim taim em i tokaut olsem PNG bai baim rais long Tailen taim ol saveman bilong ol i kam long kantri na soim yumi long groim rais.

Mista Laimo i tok Mista Masani i no kisim gutpela edvais long dispela samting bikos sapos em i kisim ol gutpela toktok, em bai save olsem lokol rais indastri long kantri i no kamap strong long wanem gavman i no givim sapat wantaim mani long strongim wok long dispela eria.



Wanpela bilong planti manmeri husat i bin go insait long Britis Hai Komisen opis long Mosbi las wik, na lukim ol samting bilong bisnis long buk na megesin em Gret Briten i save mekim.

Em i tok yumi no laikim ol savaman bilong Tailen long tokim yumi samting we yumi save pinis.

"Moabeta minista i toktok strong long gavman bilong givim moa sapat wantaim mani bilong strongim rais indastri bai go het. Na long dispela, PNG i no laikim helpim bilong Tailen," Mista Laimo i tok.

Em i tok gavman i

mas skelim na glasim gut ol samting bipo em i sainim ol agri-men wantaim ol ausait kantri, moa yet long ol kaikai samting olsem rais. Bikos long tupela samting, namba wan em long abrusim wokim wankain asua olsem long Lae pis keneri we gavman i tromoi bikipela mani long en. Long dispela, gavman i bin wokim dil wantaim kampani bilong

Malasia, Intenesenel Fud kampani (IFC) na namba tu em Tailen i mas longlong long stap long salim rais bilong em i go long ol arapela kantri na salim long PNG tasol. Gavman i noken mas ting olsem Tailen bai wokim promis long PNG i baim rais na long peibek bilong em, ol saveman bilong em bai helpim kantri long groim rais.

## COFFEE INDUSTRY CORPORATION LTD INDUSTRY AFFAIRS DIVISION PRAIS LONG WANWAN WIK

*Average prices (t/kg) as at:		22/06/98	Range	15/06/98 May -98	
<b>ARABICA:</b>					
Green Bean (DIS LAE)	Y1	355	345 to 370	372	392
	Y2	NQ	NQ	NQ	NQ
	X	384	380 to 450	419	422
	A	413	400 to 430	449	444
Parchment (Factory Door)	Class 1	252	250 to 270	256	275
	Class 2	239	220 to 260	240	256
	Class 3	227	210 to 240	240	243
Cherry (Factory Door)		54	50 to 62	55	61
<b>ROBUSTA:</b>					
Green Bean		270	-to 270	290	289
Parchment		173	140 to 190	173	146
Cherry (Indicative)		38		41	42
<b>NEW YORK "C" CLOSING</b>		<b>19/06/98</b>			
Other Mild Arabicas					
US cents/lb		114.08		121.75	129.09
1 Kina = US\$		.465		.471	.489
Toea/kg:-					
Without discount/premium		544.28		569.88	582.05
With discount of 4c/lb		525.32		551.16	566.27
Y-grade	Gross f.o.b. Lae *(1)	525.32		551.16	566.27
	Levy on (1) (2)	91.00		91.00	91.00
	Y-grade (Net f.o.b. Lae) (1-2)	434.32		460.16	475.27
* Indicative					

### MAKET TOKTOK

Prais bilong kopi i bin pundaun las wik. Prais bilong Arabika kopi long Nu Yok i bin pundaun i go daun long 80 sens wan wan paun na prais bilong Robusta i lusim klostu US\$100 long wan tan o 4.5 sens long wan wan paun. Dispela hevi i kamap long wanem i no gat sampela nius nogut i kamap long kantri Brasil. Nau em i gutpela taim bilong san na ren long Brasil.

Long PNG, eksport prais i bin bihainim intenesenel maket tu na i pundaun i go daun. Prais bilong ol prosesa i go daun liklik tasol long wanem i gat resis namel long ol baia.

Ol prais bilong f.o.b. em i as tru bilong prais bilong 'fiusa' prais wantaim kina ekseins reit i bung na kamapim f.o.b. prais; prais bilong wan wan eksporta i no wankain.

AREA	PARCHMENT RANGE			CHERRY RANGE
	ARABICA	ARABICA	ROBUSTA	
CLASS	1	2	3	
NATIONAL	250 to 270	220 to 260	210 to 240	50 to 60
KAINANTU	255 to 270	245 to 260	NQ	- to 62
GOROKA	250 to 255	230 to 250	- to 230	- to 50
KUNDIAWA	to 250	- to 230	NQ	NQ
MINJ/BANZ	250 to 260	245 to 255	- to 240	50 - to 60
M.T. HAGEN	- to 230	- to 230	NQ	NQ
WAPENAMANDA	NQ	NQ	NQ	NQ
LAE	240 - to 250	220 to 230	- to 210	NQ
ASEKI	-to 240	-to 230	NQ	NQ
MUMENG	NQ	NQ	NQ	NQ
WAU/BULOLO	-to 265	-to 250	NQ	NQ
WASU	NQ	NQ	NQ	NQ
MADANG	NQ	NQ	NQ	140 to 160
EAST SEPIK				180 to 190
Robuster cherry	- indicative			38

- Notes:**
1. Dispela stail CIC Ltd. Indastri Ales Divisan i wokim long soim ol Prais long wanwan wik.
  2. Eksins Reit: Long prais bilong US\$ wantaim kina PNGBC iet kolim pei long kina wantaim US\$ long Mandel long wanwan wik.
  3. 1kg. = 2.20462 lb
  4. Prais bilong kofi long dispela wik ikam long prais bilong ol espota na prosesa long Monde wantaim prais bilong ol 'future' prais long las Fraide.
  5. Long kisim save moa long dispela telefonim CIC Industry Affairs Division long telefon numba 732 1266.

# SBDC helpim yu wantaim ol liklik wok bisnis



Planti bisnis long Papua Niugini em ol liklik tumas. Olsem na ol i no inap long brukim wok na tilim long ol wokman meri.

Pasin bilong tilim wok long ol manmeri ken kamap sapos wanpela bisnis i ken salim olgeta prodak na servis bilong em. Bikos i nogat poin long wanpela bikipela bisnis i kisim planti wokman meri na tilim wok long ol, taim em i no inap salim olgeta prodak na servis bilong em.

Pasin bilong tilim wok long ol wokman meri i no nupela samt-

ing i kam nau tasol long Papua Niugini, nogat. Dispela pasin i bin stap long kantri long planti handred yia pinis. Tude pasin bilong tilim wok i kamap na stap yet long planti hap bilong kantri.

Long planti ples, ol save tilim wok long sait bilong man na meri. Ol man save mekim ol bikipela na strongpela wok. Na ol meri save helpim long ol liklik wok.

Hia em lista bilong sampela wok em ol man na meri save mekim:

- Wok bilong man
- Klianim bus
- Kukim bus
- Wokim banis
- Sanapim haus
- Kilim na kukim pig

- Wok bilong meri
- Planti gaden kaikai
- kamautim gras long gaden
- Kisim kaikai long gaden

Lukautim pig wokim bilum Kisi paiawut

Nau yet em mipela toktok pinis long wok bilong tilim wok long ol manmeri, we i karamapim

- ol indastri.
- ol bisnis
- ol wokman meri

Pasin bilong tilim wok i stap tu long wanwan rijon bilong kantri. Bai yu lukim olsem sampela rijon bilong kantri bai wok long lukautim kau, na sampela arapela rijon i gutpela long planim na lukautim kokonas na banana. Long Tok Inglis, mipela i kolim dispela olsem regional specialisation. Dispela i kamap bikos long gutpela bilong graun, ren na san, maunten, save bilong pipel, na ol kain samting olsem.

Moa long neks wik



# Lewinsky bai tokaut olsem em slip wantaim Clinton

**Washington, Amerika:** Yangpela meri husat i nem bilong em i pairap long wol olsem em bin wokim prenpasin wantaim Presiden Bill Clinton bilong Ameriak las yia, Monica Lewinsky, i tok em bai tokaut long kot olsem em bin slip wantaim bikman ya.

Washington Post niuspepa i bin karimaut ripot long dispela hap nius.

Ripot i tok pasin we Mis Lewinsky i wanbel long tokaut em i hap long wanpela dil em i gat wantaim ol nupela loya na narapela praivet kaunsel loya Kenneth Starr husat i karimaut ol wok painimaut long ol pasin nogut we presiden i wokim.

Ripot i tok Starr i laikim Mis Lewinsky long tok olsem em bin rong long sampela asua bikos long dispela rot bai kot i

noken givim bikpela mekim-save long en.

Tasol bikpela samting em ol loya bilong Mis Lewinsky i tokim Mista Starr olsem Presiden Clinton i no bin strongim meri ya long wokim prenpasin wantaim long em.

Wankain tu long pren bilong presiden, Vernon Jordan long tok i no tru long pren pasin we narapela meri, Paula Jones bin sutim tok long presiden Clinton na em yet i bin gat.

Ol toktok we Mis Lewinsky i bin gat wantaim pren bilong em Linda Tripp i soim olsem Mis Lewinsky i bin gat laik long Presiden Clinton na long wanpela, meri ya i bin belhat taim bikman i no laik lukluk o toktok long em. Ol toktok i stap insait long wanpela tep rekoda we i kisim tupela awa long harim.



## Malolo taim... • Wokmeri bilong beng long Australia, Yangpela Pip Whalen wantaim

22 krismas i sindaun long trafalga Skwea na soim paspot bilong em we ol kastom opisa i senisim na larim em i go hetim malolo bilong em long Ingran. Long tupela wik i go pinis, ol bin stapim em long Hitro ples balus long London na kwestenim em. Ol bin kisim balus tiket bilong em bikos ol i bin tok meri ya i laik giaman long go malolo long Ingran long painim wok na stap olgeta.

Tasol nau ol i rausim dispela ol tok we o, i sutim tok long em na ol i givim em tok orait long go hetim malolo bilong em long Ingran. Mis Whelan em bai wokim komplem long ol kastom na imigresn lain long Hitro taim em i go bek long Australia bihain long malolo.

## Ol Muslim kilim dai 25-pela Hindu pipel

**Srinagar, India:** Ol Muslim paitman long las Fraide bin kilim dai 25 Hindu pipel, sampela bilong ol i bin redi long marit long dispela taim.

Nau yet, ol ami bilong India i wok long papainim husat tru i karimaut dispela birua.

Birua ya i bin kamap long Doda we ol i ripotim olsem ples we wok na nem bilong ol Muslim paitman i stap long en.

Ripot i tok ol bin kilim dai long ples Chapnari we i stap 250 kilomita longwe long Jammu, biktaun bilong Kashmir we i stap antap long ol maunten bilong Himalaya.

Ol bin sutim dai tupela yangpela man husat i redi ina ol i wok long go long marit seremoni long dispela taim, wanpela husat i bin marit wanpela awa pastaim na narapela husat i bin wok long go long seremoni. Faivpela narapela man, foapela meri we wanpela i bin sapos long marit long dispela taim na tripela pikinini em ol no kilim ol.

Plis ripot i tok ol lain husat i kilim dai ol dispela pipel i bin go long ka na taim ol i bungim grup, ol i kisim ol man long wanpela hap na ol meri pikinini long narapela hap ol yet.

## Gates em top risman long Wol

**Nu Yok, Amerika:** Bill Gates, Bos bilong kompyuta kampani long Amerika i kisim nem olsem top risman long wol.

Dispela i bihainim ripot we wanpela megesin bilong Amerika, Forbes megesin, we i save glasim, skelim na redim dispela kain ripot i autim. Mista Gates i holim pas posisen olsem namba wan bilienia risman long wol insait long foapela krismas nau. Nem bilong tripela bilienia risman bilong Australia i stap tu long dis-

pela lista. Tupela em papa bilong niuspepa na telivisen kampani Rupert Murdoch na Kerry Packer. Narapela em Frank Lowry husat i stap long lista bilong top 2,000 risman long wol.

Mani mak long ol samting bilong Mist Gates i go antap long 40 pe sen long dispela yia na i stap long K65.38 bilien.

Mista Murdoch i namba 50 wantaim mani mak long K6.78 bilien long wanpela yia. Mista

Packer em i top risman bilong Australia. Long lista bilong ol risman long wol, em i kamap namba 98 wantaim K4.10 bilien mani mak em i winim insait long wanpela yia.

papa bilong ol stoa long Australia, Frank Lowy i kamap namba 186 wantaim mani mak em i winim long wanpela yia inap olsem K2.05 bilien.


Forbes megesin i bin pinisim ripot bilong em long disepla samt-

ing las wik tasol ol i autim nius long dispela wik tasol. Ripot bilong lista i gat long em tasol ol man husat i wok na ol i pulim ol planti samting na nem bilong ol i kamap. Na i no ol dispela husat i sindaun long ol planti samting we ol i kisim long ol papa o hauslain husat i dai lusim ol samting long ol.


Man i kisim namba tu ples long lista bihain long Mista Gates em long bisnisman Warren Buffet wantaim K42.31 bilien. Ol lain

husat i stap long top namba faiv mak em long ko faunda bilong Maikrososof kampani Paul Allen wantaim K26.92 bilien mani mak long wanpela yia na Kenneth Thomson, bos bilong pablisng kampani bilong Kanada Thomson Koporesen wantaim K18.46 bilien mani mak.

Famili bilong olupela presiden bilong Indonesia, Presiden Suharto i bin kamap nupela long lista wantaim ol samting ol i gat we inap long K5,13 bilien mak.



Long Japan, em bin tambu long pasin bilong wokim tatu o piksa long skin bilong man. Long dispela, ol i save yusim nidel i sap samting long katim i go insait long skin bilong man na droim ol kain piksa we ol i laikim.  
Maski em i tambu, long ol lain i save wokim tatu em bin wanpela bikpela samting na em i save kisim hatwok na planti awa olsem 100 na sampela de long wokim tatu. Piksa i soim man Japan wantaim tatu long baksait bodi bilong em.



B: Ol saientis o saveman i wok long kari-maut ol wok long painimaut sapos i bin gat laip long ples kol, Antartica. Ol saveman bilong Briten, Frans, Jemeni, Rasia na Yunaitet Stets i wok bung wantaim long wok painimaut long wanpela bikpela raunwara i stap aninit long bikpela aiswara long Antartica. Moa long 99 pe sen bilong Antatica em ais i karamapim tasol long ol wok painimaut bilong ol saveman, ol i bilip olsem i gat planti raunwara aninit long ais. na dispela i ken opim planti nupela samting bilong man long lukim na skelim.



C: Bilong makim 101 krismas long Fri Haus 16th Senseri ples bilong dring long han bilong wanpela famili, Kwin Elizabeth 2 bilong Ingran i bin kisim askim long pati bilong amamasim dispela. Kwin i sanap ausait long Fri haus pab wantaim wanpela 12 pek katen bia we ol bin prisanim long em olsem presen long man bilong em.

**trukai**  
**RICE**  
*That's right*

# LAIBSTAIL

## KANAGE

"Em nau, narapela wik bilong mi ken"



• Kanage em lapun man na i no save malolo long hap wok bilong graun. Mekim na wanpela taim misi i hatim em: "Olgeta taim yu save lodim planti kago tumas, na mi les pinis. Bai mitupela go lukim ol nes na dokta long yu noken lodim tumas. Nogut bai mi bagarap na dai ya".

Taim tupela kamap long haus sik, dokta na nes i askim tupela: "Olsem wanem na yutupela i kam, wanem wari bilong yutupela?"

Orait meri bilong Kanage kirap na tokim nes na dokta olsem: "Mi les pinis ya. Olgeta taim long nait, em save tokim mi olsem, suruk i kam, suruk i kam, mi kol ya". Ol nes na dokta harim olsem na kirap tokim Kanage: "Yu lapun tumas, yu mas isi isi. Nogut yu yet painim indai klostu".

Lapun Kanage harim olsem na dispela i no holim em. Na em kirap bikmaus long ol: "Na wanem, lapun na wip yet. Mi stap long mak bilong em ya. Yupela ol nes na dokta, yupela lukim mi, antap lapun, daunbilu yangpela yet!"

Misis Kanage bel kaskas olgeta nau long man bilong em. Na em bikmaus long Kanage: "Yu mas wanpela pig ya. Yu go kaikai kondom na dai isi isi."

Man ol arapela sikman meri wantaim nes na dokta i harim olsem na kilim skin stret long lap.



• Tupela mama i mekimsave long salim buai bikos em wanpela rot tasol bilong kisim mani.

### WINA BILONG DISPELA WIK EM RICHARD SEMEN WEWAK

SAPOS yu ting yu gat wanpela gutpela pani stori, orait katim hap pepa long fran pes i makim, "Mutrus Kanage bilong dispela wik" na salim wantaim stori bilong yu i kam long *Wantok Nuspepa*, PO Box 1982, Boroko, NCD. PNG.

Putim nem na adres bilong yu long pas na bai yu gat sans long kamap wina bilong "Mutrus Kanage bilong dispela wik" na winim wanpela priz. SANS YA!

Stori na nem bilong yu bai kamaut long wanwan wik so noken lus tingting long baim *Wantok n Nuspepa* na painimaut! SEKIM NEM BILONG NAMBA 3 WINA LONG PES 13



• Kanage em bilong ples Imbras long Maprik distrik long Is Sepik provins. Em i hap man bilong kilim abus long bus long kainkain we na stail.

Wanpela de em i go raun long bus long painim hap ol pig save stap long en. Em painim pinis na digim wanpela bikpela hul. Na bihain em i karamapim gut tru dispela hul. Na stap redi tasol long wail pig bai kam na go insait.

Long apinun em i go bek long ples na stap isi na slip. Long nait Kanage driman olsem em yet i pundaun long dispela hul bilong pig em bin digim long san. Olsem na long moning, em i no isi long amamas. Em i kalap i go antap na kam daun. Na tokim meri long driman. Na makim olsem driman i soim olsem pig i mas pundaun pinis long hul.

Kwikwan em kisim spia na bunara wantaim dog bilong em na go nau long sekini: hul long bus. Em kamap klostu long hul na pilim pekpek. Orait em toilet pinis na i no klinim as.

Isi tasol em krol i go na pendau long lukluk i go insait long hul sapos pig i stap insait. Em taim dog i smelim pekpek na kam bihain. Na welim tang long as bilong Kanage. Trangu Kanage kalap nogut na singsaut wantaim, na abrus na hetwin i go insait long hul bilong pig. Trangu mama pig long hul i mekimsave stret long sindaun bilong Kanage.

Tony Moses (Namba 2 wina) KIMBE

• Lukim moa tokpilai wantaim Kanage long pes 13.

## Hatpela laip na mani pusim lo na rispek long arere

LAIP na sindaun bilong tude long ol taun na siti i strong long mani.

Sapos yu nogat mani, sore tumas, bai yu kisim taim stret ya. Na dispela bai pusim yu long mekim wok bilong kisim mani, we i no bihainim lo o rul bilong sosaiti. Na tu long sem taim, wok bilong yu long kisim mani na stap laip bai nogat rispek long ol arapela manmeri o pipel.

Dispela i kamap bikpela nau long Mosbi siti. Long dispela taim, strong bilong PNG mani (kina) i pundaun egensim mani bilong ol biknem ovasis kantri olsem Ostrelia, Amerika na Japan.

Mekim na prais bilong ol kaikai long stua i go antap turu. Dispela i givim hatpela taim stret long ol liklik manmeri long siti. Liklik maket ol i kisim long ol pipia wok, na tu long wok bilong salim buai na lus smok i no inap.

Mekim na ol pipel i mas wokhat moa long kisim moa mani bilong baim kaikai, klos laplap na PMV bas fi bilong ol skul pikinini, na kain samting olsem.

Nau yet long olgeta hap rot long Mosbi, bai yu lukim papa bilong ol haus i salim buai na lus smok ausait o insait long banis waia. Bikos ol laik kisim moa mani.

Sampela i salim buai na lus smok hait long ai bilong ol bikpela stua olsem Stop n Shop, bas stap, maket ples we i gat tambu, o ausait long eria o opis bilong narapela pipel, we i nogat tokorait pastaim.

Sampela wik i go pinis, wanpela man lsten Hailans na meri bilong em salim buai ausait long fran bilong wanpela haus. Haus ya i stap long opis eria o fran bilong opis.

Papa bilong haus na bikbos bilong opis i rausim ol planti taim tru. Tasol ol i no muv o klia long dispela eria. I go na wanpela taim, bikbos i bungim ol stret na tokim ol long raus.

Ol kros i go i kam na komplem olsem em long pinis bilong banis waia na rot em pablik graun. Na ol i ken mekim maket o salim buai na lus smok. Olsem na opis na papa bilong haus i nogat rait long rausim

o krosim ol.

Papa bilong haus traim long givim skul o kliam as bilong ol i mas raus. Em i tok olsem graun long pinis bilong banis waia na rot em responsibiliti bilong wanwan opis o haus i stap long klinim na mas stap klin. Olsem na ol i gat rait long komplem na rausim ol manmeri i salim buai long fran bilong haus o opis. Bikos ol bai kamapim planti pipia, we i no gutpela long ol bisnis lain bilong opis i kam lukim.

Na tu dispela em i no maket ples. Bikos planti ka save kam stap long rot long baim buai. Na dispela ken kamapim eksiden.

Tasol man na meri ya i no harim tok. Mekim na papa bilong haus i tok: "Maski yupela stupid turu ya". Meri bekim: "Ai mi no stupid, yu stupid, yu harim!"

papa bilong haus i go ripot long plis. Ol plisman i kamap na rausim ol. Tasol sampela wik nau, ol i wok long salim buai yet. Na taim ol i laik pispis o pekpek, ol save go long hapsait bilogn rot long hap bus. Na mekim dispela hap olsem toilet bilong ol.

Man lsten Hailans i komplem tu olsem mipela mas traim na sore long ol. Bikos bisnis bilong salim buai na lus smok em wanpela rot tasol bilong ol long kisim liklik wan siling.

Dispela kain bekim em wanpela meri Simbu i givim long Godens maket, taim mi baim buai long em. Meri ya karim buai raun long liklik plastik long 8 klok moning samting, wantaim sampela arapela hailans manmeri. Na wok long salim hait hait. Bikos ol wokman meri bilogn NCDC tambuim ol long salim buai long Godens.

Taim mi baim buai na askim, em i tok: "Ol mas sore long mipela ya, mipela save strong long dispela wok bilong salim buai na lus smok ya".

Mekim na mi tingting, sapos yupela painim hat, orait go bek long ples bilong yupela. Graun na bus wantaim wara i stap. Yupela ken wok long graun na kisim mani. Na maski kam brukim lo o mekim pekpek o pipia nabaut long siti o taun.

Lo i stap long lukautim mipela olgeta.

Sapos ol i tok, noken salim buai long hap, em bilong mekim ples i stap klin. Orait salim ol buai long maket ples tasol we NCDC i oraitim.

Long Gaden Hills supamakot long Waigani haiwe, i gat wanpela maket i kamap nau. Ol lsten Hailans pipel long setelmen long Gaden Hills i go pas long maket. Na salim ol liklik gaden kaikai olsem taro, kaukau, aibika, na smok na lus smok, wantatim mit olsem lem fleps.

Planti arapela kaikai olsem onion na kokonas em ol i baim long ol bikpela maket olsem Godens. Na bihain go salim long bikpela prais long kain maket olsem.

Nau yet i nogat save olsem NCDC i oraitim kamap bilong dispela ples olsem maket. Tasol wanpela o tupela bikman save klinim dispela maket long sampela apinun. Bikos tupela klinim dispela maket, tupela pilim olsem tupela ken kisim 20t takis long ol manmeri i maket.

Mi bin bungim wanpela bilong dispela bikman, taim em i askim wanpela meri Papua i salim kokonas long baim takis. Meri ya tok em bai baim 20t sapos lapun man ya i givim em risit, we lapun i nogat.

Mi harim na askim lapun, yu gat pepa o laisens bilong maket long kisim takis. Em tok nogat. Em tok tasol olsem em wanpela Siti Ranger. Na save klinim maket. Olsem na em mas kisim takis.

Mi tokim em olsem em i rong. Tasol em i strong yet na kolim mi stupid. Mi lap tasol long em na tekov.

Bihain narapela man i kam na tok dispela lapun ting em saveman ya. Olsem em kisim dispela graun long ples bilong em i kam na laik kisim takis. Na mi bekim: "Larim, hat long putim gutpela tingting i go insait long kain ol longlong man olsem".

Dispela i soim olsem rispek na lo i stap bihain nau long ol kain liklik samting olsem. Tru laip na sindaun i hat. Tasol sapos mipela i no luksave long rispek na lo o rul bilogn sosaiti o komyuniti, em bai kamapim moa hatpela taim long laip na sindaun bilong mipela.

## EDDIE SANDERS i raitim

OL yangpela meri i mas stop long bihainim ol olupela man i gat mani na i gat sik AIDS. Dispela ol man i gat sik AIDS, na gonoria. Na ol i wok long givim long ol yangpela na kilim gutpela yangpela laip bilong kantri.

Leo Miria, siaman long PNG AIDS De na bos bilong Centrel AIDS Kaunsel i tokim moa long 70 yut lida bilong NCD na Sentrel provins. Ol i bin bung long wan wik awenes na developmen semina we i glasim sik AIDS, ol arapela sik save kamap long pamuk pasin na hevi bilong drag (spakbrus) na spak pasin. Dispela bung i kamap long Sivirai Namona ausait long Mosbi siti las wik.

Ol yut lida bilong ol wanwan sios olsem SDA, Katolik, Engliken, Luteran na Yunaitet Sios long dis-

## Ol yangpela meri mas lukaut long sik AIDS

pela bung long Mande 18 Me na pinis long Sarere 23 Me.

Insait long dispela bung o semina, ol opisa husat i givim toktok i kam long AIDS Kaunsel, plis dipatmen, Nakotiks Biru, CIS, ICRAF na o misineri yet.

Long sik AIDS, Mista Miria i tok dispela toktok bilong em i tru. Em i givim sampela namba o statistik bilong ol yut long karim i go na skurim ol yut bilong ol. Bikos em i tok planti yangpela skul studen long NCD na Sentrel provins i wok long bungim birua bilong ol dispela sik nogut na bagarap.

Mista Miria i tok planti yangpela long tude i save laik slip wantaim narapela na senisim ol pren man o meri bilong ol olsem ol i save

senisim ol kolos bilong ol. Pasin bilong smok mariwana na dring bia na stap tu i kamap strong long laip bilong ol yangpela tu. Taim ol i dring spak o smok mariwana na het paul, ol i laik painim pren bilong ol na slip wantaim.

Mista Miria i tok dispela i no gutpela pasin bikos em ol i bagarapim gutpela yangpela laip bilong ol long ol pasin nogut tasol.

Em i askim ol yangpela meri tu long i noken mekim nabaut long skin bilong ol long amamas bilong mani o yangpela laip bilong ol tasol. Ol i mas lukautim gut bodi na skin bilong ol.

Em i askim ol yut long ol i mas noken sem o haitim tingting bilong ol. Ol i mas tokaut stret long arapela

yut memba bilong ol long dispela birua o samting nogut. Ol i mas go na sekim blut bilong ol long haus sik long luksave sapos ol i nogat sik nogut na tu sekim bodi bilong ol sapos bodi bilong ol i no bagarap long ol spak brus na bikhet pasin bilong ol.

Em i tok rekot bilong PNG long kisim sik AIDS em namba tu na bikpela insait long Saut Wes Pasifik rijen bilong wol we i winim ol kantri olsem Saina husat i gat planti manmeri moa long PNG. Na i bikpela long olgeta kantri tu long Saut Pasifik rijen.

Em i tok dispela hevi bilong sik AIDS i bikpela long hevi long ol yangpela bilong mipela tude bikos ol bai karim dispela hevi i go planti

long bihain taim ol i kamap mama papa bilong dispela kantri.

Mista Miria i askim nau Gavman givim moa mani i go insait long pasin bilong kempen egensim sik AIDS na spak brus long skul level taim ol studen i yangpela yet. Ol i mas mekim kempen tu long ol televisen, redio na niuspepa.

Em i salensim ol helt woka tu long i noken tok hat o mekim sem long ol manmeri husat i gat ol kain sik na hevi olsem. Bikos dispela bai mekim ol i sem long kamap na tokaut na ol bai karim sik na hevi i go raun na givim moa yet i go long ol arapela.


Mista Miria i ting wanpela strongpela rot em long yusim ol yut long kempen egensim dispela kain hevi nau i kamap long kantri namel long ol yangpela bilong mipela long sevim laip bilong ol yangpela manmeri.

# 93 FM YUMIFM

## Redio Stesen bilong yumi yet

Harim olgeta gutpela program  
long 93FM YUMIFM

\* Olgeta lokol sing sing, na ol musik bilong bipo yet.



- \* PNG MOTORS - Prais bilong kes krop.
- \* YAMAHA - Provinsel weda ripot.
- \* BSP - Liklik bisnisman ripot.
- \* PEPSI - Lunch hour rikwest.
- \* CITY PHARMACY - Lukaut bilong bebi
- \* POST (PNG) - Ron bilong ol sip.
- \* ELA MOTORS - Kantri kaundaun.
- \* AMERICAN - Gol.
- \* SANDE - Gospel so.

Em rait Redio Stesen ikamap pinis, harim long tok ples bilong yumi yet, 93FM YUMIFM

**SALIM RIKWEST I KAM LONG:  
YUMIFM Rikwest, Locked Bag 93,  
Port Moresby, NCD, Fax: 320 1995**

**PNG FM PTY. LTD.**

**TRADING as NAUFM and YUMIFM  
P.O. Box 774, Port Moresby, Papua New Guinea  
Phone: (675) 320 1996 Fax: (675) 320 1995**



Nem: Mis Christina Mensah  
Krismas: 27 (singel meri)  
Adres: PO Box A-276, Adisaldel, Cape Coast, Ghana.  
Save Laikim: Kukim kaikai, droim na penim ol piksa, na raun lukim ol nupela ples.



Nem: Beatrice Davies  
Krismas: 26 (singel meri)  
Adres: PO Box CT 1396, Cape Coast, Ghana, Central Region.  
Save Laikim: Mi laik bungim wanpela man PNG long pren wantaim na maritim.

Nem: Ollovey Dadson  
Krismas: 24 (singel meri)  
Adres: C/- Francis Darko, University of Cape Coast, English Department, Cape Coast, Ghana.

Save Laikim: Ol samt ing mi save laikim tru long mekim long fri taim bilong mi em prenim ol man, harim ol lav singsing, raun na lukim ol nupela ples. Bikpela laik bilong mi em long painim wanpela man PNG long maritim.



Nem: Mis Philomena Naana Benson  
Krismas: 24 (singel meri)  
Adres: Post Office Box CT 1502, Regional Headquarters, Brofoyedur, Cape Coast, Ghana, West Africa.

Save Laikim: Raun na go lukim ol nupela ples, swim na waswas long solwara o wara, harim kainkain musik, danis, lukim piksa na senisim poto wantaim ol pren.



#### TOKSAVE I KAM LONG EDITA:

Bekim leta bilong ol meri Ghana long Tok Inglis tasol.

# KANAGE

"Em nau, narapela wik bilong mi ken"



• Kanage stap long Mosbi na go wiken long Wewak wantaim tambu bilong em. Taim Kanage lukim ol buai na daka bilong Sepik, em i no wet. Boi nogut mekimsave long hamarim stret i go inap apinun.

Na long nait, bel bilong em i tanim tanim. Em pilim olsem em laik pekpek wara. Na tambu lukautim em i go long toilet. Insait long toilet, Kanage spetim na wokim kainkain nois stret. Yu save, pekpek wara ya.

Mekim na tambu harim na singaut i go insait long toilet: "Tambu, em wanem nau ya".

Kanage tanim bun wantaim na singaut i kam ausait: "Mi bomim Iraq ya".

## Lucas Poki (Namba 3 wina) WEWAK

• Bikpela ska resis i laik kamap namel long ol pipel bilong Sisano, Warapu, Arap, Pou na Serra long Sisano spots graun. Dispela taim lapun Kanage pulim soks bilong em wantaim su na raun raun long pilai graun olsem wanpela soka sta stret. Bipo pilai i stat, i gat opening prea pastaim. Bikman bilong pilai lukim katekis o pater bilong wokim prea i no stap. Na em askim Kanage: "How about you? Can you o nogat?"

Lapun Kanage lukim ol meri Sisano sanap beksait long em. Olsem na em i tromoi hap tok inglis: "Right party, small things, let me kicking off." Em tok olsem ran i go antap long gren sten na stat long mekim mak bilong diwai kros.

Wanpela lapun man tu i kam stap long lukim pilai. Dispela lapun man em meme bilong em i bin dai long asde. Na em save laikim gut tru dispela meme. Taim lapun ya i lukim Kanage antap long gren sten, em krai nogut tru.

Kanage lukim na toktok i go daun long lapun ya: "Yes lapun, mi sutim stret na yu pilim ol sin bilong yu, na krai nau a?" Na lapun i tokim em: "Nogat, kela bilong yu, nus gras bilong yu, maugras bilong yu, na nek bilong yu i wankain stret olsem meme man bilong mi i dai asde na mi planim pinis. Mi lukim yu na tingim meme bilong mi. Olsem na mi krai". Kanage harim olsem na lus nating long gren sten taim ol manmeri i pasim ai yet long prea.

## Adrian Mekar AITAPE

• Wanpela nait em gutpela mun tru i lait. Na Kanage go raun lukluk long gaden bilong em. Bikos ol man save stilim ol wotamelon bilong em. Kanage stap long gaden i go na biknait. Na em i go bek long ples.

Long hap rot pekpek i kilim em wansait stret. Na em i go pekpek long as bilong wanpela diwai. Antap long drai lip bilong dispela diwai, em wanpela pisin slip i stap.

Kanage pekpek pinis na painim samting bilong klinim as. Na em putim han i go antap long rausim wanpela drai lip long klinim as na holim stret dispela pisin. Kanage i no save. Em yusim pisin long klinim as na bihain tromoi. Na pisin flai i go.

Man Kanage kirap nogut stret olsem drai lip i tanim olsem pisin na flai i go. Bihaun em luksave na em tok: "Yu tu ya, mekim na



mi ting drai lip bilong diwai na mi rongim yu pinis."

## Robin Gawi WEWAK

• Kanage bilong ples Dassi long Sandaun provins. Wanpela taim em go lukim kandre bilong em Ricky husat i stap hapsait long wara Dassi. Na tupela sindaun na kaikai buai i stap. Tupela mekimsave long spak buai ya. Na bihain long 5-pela buai, ai bilong Kanage i raun pinis. I no longtaim meri bilong kandre Ricky wokabaut i kam. Kanage lukim na ting em narapela meri. Na em tromoi hap tok pisin olsem: "Oiyu, Kumul karim o?"

Meri ya harim olsem na singaut i go bek long Kanage: "Sem bilong yu. Yu no save olsem yu sindaun wantaim man bilong mi."

Man taim Kanage luksave olsem em rong pinis, em sem pipia stret. Na lusim kandre na tekov long haus bilong em.

## Rae Essau VANIMO

• Kanage em wanpela lus man bilong Yonki. Wanpela Fraide em i go long maket na lukim wanpela meri nambis. Meri nambis i werim sotpela siket na raun long maket i stap. Na boi nogut sanap stailim em yet na wisil i go long meri ya. Na putim skin na pinisim stail bilong em. Taim sotpela siket tanim na lukluk, boi nogut ya tanim het i go long bus. Sotpela i

siket lukluk strong long Kanage na tokim em: "Hei! Lukim em! Yu no sais bilong mi!"

Kanage harim dispela na stailim em yet moa na bekim tok: "Yu karim ya". Sotpela siket i bikmaus nogut tru na krosim Kanage: "Yu go painim longpela siket, em sais bilong yu".

Taim ol manmeri i harim dispela, ol lap nogut tru. Na Kanage sem pipia stret na sikirapim rasta het bilong em.

## Robin Aroke KAINANTU

• Kanage em wanpela lapun bilong ples kanaka long Morobe. Long laip bilong em, em i no bin lukim Lae siti. Orait wanpela Fraide, em kisim pikinini na tupela kalap long PMV na go long Lae. Tupela kamap long Lae siti long bikmoning stret. Na i no tingting long go putim kago long haus bilong ol wantok, nogat. Em tingting long tupela i limlimbur pastaim.

Tupela pinisim olgeta kona bilong siti na ples i laik tudak. Orait tupela hariap long

krosim rot na go long hapsait. Sem taim wanpela PMV bas i kam na pamim pikinini bilong em. Ol manmeri singaut na em tanim na lukim, tasol tulet.

Plis ka i kam stap. Wanpela plisman go ausait na rausim ol manmeri i kam bung na sanap lukluk i stap. Na bihain i go askim lapun Kanage: "Papa, yu sanap olsem wanem na bas kam pamim pikinini bilong yu?"

Yu save, Kanage em ples man ya. Em kirap na bekim: "I stand here my pikinini sanap long hap. I no save bas sipit givim sipit givim momomani yelo bam." Man plisman i paul olgeta long tok pisin bilong Kanage. Na tokim em kalap long plis ka na go long plis stesin.

## Uri S Sigop LAE

• Kanage bilong Menyamya long Morobe provins. Em save aigris stret long wanpela meri. Em save wari tru olsem em mas prenim dispela meri. Orait wanpela de em bungim meri ya wanpela long maket ples. Na paitim tok gris wantaim em i go na askim: "Susa, inap mi planim sit bilong kukamba long gaden bilong yu?"

Meri ya harim olsem na em lap indai stret, na bihain em bekim: "Yu no pikinini na yu laik planim sit bilong kukamba." Kanage harim olsem na bekim: "Olsem orait mi ken planim tapiok na stik taro." Meri ya harim olsem na pilim rait olgeta. Na em tokim Kanage: "Em nau, kain olsem em wok bilong man ya." Kanage askim gen: "Susa, yu laikim mi planim hamas taim." Meri ya bekim: "Laik bilong yu yet. Sapos yu laik planim 7 deis a wik, em i orait. Tasol nogut yu malolo long wan minit o wan seken tasol ya." Kanage kisim win olgeta long kain naispela bekim na em tok: "Susa, nogat ya, mi save wok 6 tu 6 long 7 des a wik."

## S.K. Solu Igam Bareks, LAE

• Namba wan pikinini bilong Kanage skul long sains stadi long Yunivesiti ov Papua Niugini long Mosbi. Krismas holide na em i go malolo long ples. Kanage lukim pikinini man bilong em na amamas nogut tru. Na wanpela nait Kanage askim pikinini long tupela go painim pis long solwara. Tupela pusim kanu i go daun long solwara na go huk. Tupela sindaun huk i stap na Kanage askim pikinini olsem: "Son, what do you learn at the university?" Na pikinini bekim: "Dad, we learn biology, geology na psychology." Sampela minit bihain papa Kanage askim gen: "Son, if our canoe sinkology, are we

gonna swimkology to the shoreology?" Man pikinini man lap indai stret long paul inglis bilong papa Kanage, na bekim: "Em nau papa, yu rait olgeta". Samting tru em papa Kanage i brukim bus na pikinini no laik semim em.

## Benson N. Zake FINSAFEN

• Kanage bilong Erap long Morobe provins. Em prenim wanpela yangpela meri long asples yet. Tupela save hait raun na slip wantaim. Tasol papamama bilong tupela i no save. Meri ya em i wanpela hambek meri. Beksait long Kanage, em save givim kaikai long ol arapela yangpela man long ples. Tasol Kanage yusim blak pawa long autim tiket bilong meri ya. Na meri save tokim Kanage: "Darling, I love you so much". Na Kanage save bekim: "Same feelings I got".

Mekim i go na meri ya i gat bel. Na ol hetman kisim meri i go askim: "Yu kisim bel long husat?" Meri haitim olgeta man na kolim nem bilong Kanage tasol. Taim ol singautim Kanage i kam, em i tok: "Nogat em i no kisim bel bilong mi. Em kisim spia bilong mi 5-pela taim, tasol pikinini ya i no bilong mi tasol. Em bilong planti mangi". Man, pekato i kamap ples klia nau. Tasol meri i strong na Kanage i maritim em.

## Blang Hitsy Modi Voco Point, LAE

• Kanage em bilong ples Sikentika long Karkar Ailan, Madang provins. Wanpela taim em wantaim meri laik go lukim tambu meri long Goroka haus sik. Tupela go kisim balus tiket long Kinim. Neks de tupela kisim balus long Karkar na flai i go long Madang taun. Na bai senisim balus i go long Goroka.

Tupela ting sem balus bai go olgeta long Goroka. Tupela kalap long sem balus na pundaun long Karkar ailan. Trangu Kanage na misis i no save. Tupela kam ausait long balus na Paps Kanage tokim misis: "Man, Goroka i wankain olsem Karkar ya". Tupela tok olsem na wokabaut i go long painim Goroka haus sik. Taim tupela lukim ol manmeri long rot, Kanage askim: "Inap yupela soim mipela long Goroka haus sik". Trangu ol manmeri i lap long tupela, na tok: "Sekim yutupela yet pastaim, kokonas save kamap long Goroka tu o nogat?"

## N. Herape S. KIMBE

# Kayan pipel laik holim strong pasin tumbuan

**WENCESLAUS MAGUN**  
i raitim

WANPELA saveman i tok, man i nogat kalsa em man i nogat sol. Olsem tasol sapos man i nogat sol em i no inap i gat kalsa. Na man i nogat kalsa na i nogat sol em i no man tru. Ating em wail abus o i nogat laip.

Planti man long planti hap bilong graun i bilip olsem taim ol dai, spirit o sol bilong ol bai i go na stap long narapela laip. Dispela laip bihain long taim ol dai em i gutpela moa long dispela laip nau ol i stap long graun na bungim.

Kalsa em i piksa bilong bilip o pasin bilong man long laip long dispela graun wantaim sol o spirit bilong em, na masalai o tambaran o god we em i save lotuim, na adorim long kisim helpim taim strong bilong em yet i no inap long mekim o kisim samting.

Insait long kalsa i gat kankain pasin tumbuna. I gat pasin tumbuna bilong singsing na amamas long taim mama i karim pikinini, long taim bilong kamautim kaikai long gaden, long taim bilong marit, long taim bilong wokim gaden, wokim haus, brukim haus i go daun, painim abus, painim pis, go long pait, long taim man i dai na moa yet.

Wanpela saveman bilong Nesenel Kalsarel Komisen, Chris Issac i tok pasin bilong tumbuan, tambaran, dukduk o malangan em i as bilong olgeta tumbuna pasin.



• Ol pipel bilong Kayan i danis wantaim bikpela tumbuan (Tukumang) long ples Kayan.

Insait long pasin tumbuan, tambaran, dukduk o malangan ol i prea lida o kukurai o het bilong wanwan klen o traib i save lotuim masalai o god bilong ol bilong kisim ol kankain strong long mekim samting olsem mi kolim antap.

Mista Isaac i tok pasin tumbuan em i olsem wanpela rilisen bilong Papua Niugini. Insait long dispela

kalsa bilong tumbuan, dukduk, tambaran o malangan, i gat wokman bilong ol dispela masalai o god. Dispela ol wokman i gat bikpela wok tru insait long wanem sosaiti we kalsa bilong tumbuan i stap.

Long kisim pawa long dispela masalai, ol bikman bilong dispela rilisen bilong tumbuan i mas beten long bel bilong ol tru na mekim

planti penens bai masalai o god bilong ol i ken amamas long ol na givim ol wanem samting ol i laikim. Planti taim ol i mas kaikai drai kaikai, tambu long dring wara, kaikai kawawar, katim skin, noken slip wantaim meri bilong ol, na mekim ol arapela penens.

Dispela pasin tumbuan i pinis long planti hap bilong PNG tasol ol pipel bilong Kayan insait long Bogia distrik, Madang provins i holim yet dispela bilip o kalsa na i tingting long strongim gen tumbuan kalsa bilong ol bai i no ken lus.

Long las wik Sarere, samting olsem 1 kilok long moning, ol pipel bilong kayan i kisim mi i go insait long wanpela haus man bilong ol long lukim ol tumbuan bilong ol na kisim stori.

Ples i tudak olgeta insait long dispela haus man na ol bikman i sindaun long sait sait bilong haus na redim ol samting bilong bringim tumbuan i kam ausait. Mi no inap lukluk i go moa long wan mita bikos i nogat inap lait. Tasol long baksait bilong mi na long saitsait mi ken lukim ol tumbuan i stap.

I gat tupela liklik tumbuan ol i kolim Auzang na tupela bikpela tumbuan ol i kolim Tukumang insait long dispela haus man. Mi traim hat long painim aut sapos wanpela bilong Auzang na wanpela bilong Tukumang em i meri o man tasol ol bikman i no tokaut klia long dispela. Ol i tokim mi olsem olgeta tumbuan wantaim em ol man.

Wanpela bikman, Joe Pasu i tok Kayan ples i gat tripela traib: Nongdangan; Sambaie; na Wargem. Insait long Nongdangan i gat sikspela klen: Waot, Kuring, Sargum, Taungnongem, Kadid na siar-bazan. Long Samgaie ol i gat faivpela klen: Anze, Kawang, Yakatongem, Niamb na Ndaenung na insait long Wargem i gat tripela klen: Kainbat, Wauktanzan na Ngombreak wantaim Waswa na Wep.

Mista Pasu i tok wanwan bilong ol dispela traib i gat tumbuan bilong ol yet. Long las Fraide ol i redi long soim tumbuan bilong wanpela klen bai Madang provin-sel gavman, na Nesenel gavman i ken luksave olsem ol tu i gat Mask Kalsa o tumbuna kalsa.

Em i tok ol i no save bringim ol tumbuan i kamaut long ples nating tasol long dispela taim tasol ol bai

brukim dispela lo liklik long soim PNG na wol olsem ol i gat dispela kalsa.

Mista Pasu i tok, taim ol i laik bringim ol tumbuan i kam ausait, ol i mas redim inap pik, basket, garamut, saksak, pis, na ol arapela kaikai na abus. Bikos taim tumbuan i kam ausait, ol i mas givim kaikai i go long ol lain husat i bringim singsing i kam ausait wantaim tumbuan.

Em i tok tu olsem pasin bilong Tumbuan em i strongpela kastom we ol pikinini man tasol i save mekim. Dispela pasin bilong redim tumbuan i ken kisim moa long foapela mun.

Insait long dispela foapela mun husat ol man i wok long redim tumbuan bai tambu long kaikai ol kaikai i gat sup. Ol bai kaikai tasol ol drai kaikai tasol, dring solwara, tambu long slip wantaim meri na mekim sampela moa strongpela penens.

Mista Pasu i tok sapos wanpela man i brukim wanpela bilong ol dispela tambu, em i no inap go insait long haus man na lukim tumbuan o mekim wok bilong redim tumbuan o bringim singsing tumbuan i kam ausait long ples. Em i tok sapos em i laik hait na mekim dispela pasin em inap sotwin, hairaun, na pundaun long taim bilong singsing tumbuan.

Em i tok wanpela bikpela as bilong ol tumbuan i save kam aut na singsing em sapos wanpela memba bilong ples Kayan i mekim wanpela bikpela rong. Kain olsem sapos bikpela brata i paulim meri bilong liklik brata, orait liklik brata bai singautim ol tumbuan long kam aut singsing na em bai kilim pik na givim long ol tumbuan. Long wanpela pasin bikpela brata tu bai kilim pik na givim i go long ol lain i bringim singsing i kam ausait.

Dispela pasin bilong singsing tumbuan em pasin bilong sekan, tok sori na tambu long mekim ol bikpela rong insait long komyuniti. Long hia yumi ken luksave olsem Tumbuan i gat bikpela wok bilong mekim. Em i stap olsem bris bilong bungim bikpela brata na liklik brata na bringim bel isi i kamap bek gen insait long sosaiti.

Mi go slip olsem hap awa tasol na long sik kilok long bik moning tru, ol tumbuan i kirapim mi gen. Pes tru, tupela liklik tumbuan Auzang i bringim singsing i kam ausait long bikples. Long taim ol i kam ausait long bus, ol meri bilong dispela klen, i amamasim ol tumbuan bilong klen bilong ol na kapsaitim paura bilong saksak, na drai kokonas antap long tumbuan. Ol i brukim tu ol drai na kapsaitim wara long pes ol tumbuan i wok- about i go i kam.

Bihain long ol liklik tumbuan i kam ausait na danis i go pinis, ol bikpela tumbuan Tukumang i kam ausait na givim samsam ken. Taim ol Tukumang i kam ausait, ol meri i slip long graun na ol Tukumang i kalapim ol i go na ol arapela meri i kapsaitim paura bilong saksak, na kokonas na brukim kokos na kapsaitim wara bilong kokonas i go long Tukumang.

Ol tumbuan i danis long namel bilong bikples Kayan i go inap Rijinel Memba bilong Is Sepik, Sir Michael Somare na meri bilong em wantaim memba bilong Makam, Bart Philemon, Deputi Gavana bilong Madang Pengau Nengo, namba tu bos bilong rises long Nesenel Kalsarel Komisen, Chris Issac, na dairekta bilong Madang Visites na Kalsarel Buriu, Lucas Kawage i kam long opim dispela namba wan Kayan Kalsarel So.

## RESIS BILONG RAITIM STORI

Yu save yu gat sans long winim kes prais inap long mak bilong K4000, wanpela Kundu Save akaunt na Mobil fuel voucher.

Raitim wanpela sotpela stori tumbuna, stori, redjo pilai na essay.

Het tok bilong essay em, "Bilong wanem na pasin bilong rit na rait i gutpela?"

Long pilai yu mas katim dispela hap pepa daunbilo na raitim nem bilong yu wantaim na salim i kam.

### Hia em ol prais:

**Essay** - K500 / bes essay

### Ol man-meri:

Bes sotpela stori - K300/Mobil Oil fuel voucher

Bes redio pilai - K300

### Haiskul/vokensol skul/code:

Bes tumbuna stori - K150

Bes sotpela stori - K150

Bes redio pilai - K150

### Top UP-/ Kominiti skul:

Bes tumbuna stori - K100

Bes sotpela stori - K100

Bes redio pilai - K100

Name: .....

Adres: .....

Telepon: .....

Levol makim Haiskul, Top up, bikpela man/meri: .....

Wanem stori yu raitim: .....

Olgeta pas i mas kam long Word Publishing bipo long namba 8 dei bilong September.

Creative Writing Competition,  
Word Publishing Co. Pty. Ltd.  
P.O. Box 1982, BOROKO, NCD 111.  
Telephone: 325 2500 Facsimile: 325 2579

Sapot bilong dispela resis i kam long;



**Mobil RIO TINTO**

National Literacy Awareness Secretarial



# Kas bilong wel pam long Mosbi so

**EDDIE SAUNDERS i raitim**

YUMI fit long risets o wok paini-maut long wel pam we ol arapela kantri long wol i luksav. Marcus Bai bilong Wes Nu Briten i apim nem bilong PNG long pilai ragbi lig long Ostrelia. Na Dami Wel Pam Risets Developmen bilong Wes Nu Briten tu i apim nem bilong kantri long wol.

Na sapos PNG i ken amamas na so op liklik long agrikalsa risets na developmen kamap long Papua Niugini yet, yes yumi ken. Wanpela bilong dispela gutpela developmen em pasin bilong kamapim gutpela pikinini wel pam.

PNG i kamapim wanpela nam-bawan na fit nating wel palm sidling o we bilong kamapim ol pikinini wel pam bilong planim long plantasin insait long kantri na ovasis tu. Yumi salim nau ol sidling i go long planti ap bilong wol. PNG i ken amamas na danis long dispela kain kaikai long kain taim olsem Mosbi So. Na i no putim kainkain pilai nogat as na nem long developmen bilong kantri na kisim nating mani bilong ol trangu grasrut pipel.

Nau yumi mas lainim ol pikinini long wok long graun bilong ol, planim wel pam, kokanas samting long lukautim laip bilong ol na pikinini bilong ol bihain.

Tok bilong bipo stap yet olsem agrikalsa em bun bilong yumi. Na yumi em agrikalsa pipel. Kopa, gold, wel na olgeta samting bai pinis tasol agrikalsa bai i no inap pinis. Olsem na em i bun bilong yumi.

Dispela kem toktok bilong wanpela yangpela save manki bilong oil palm rises na Developmen insait long kantri i kam raun wokim dispela o promosen soim rises na developmen wok bilong Dami Wel Palm Rise Developmen long 1998 Mosbi long Moitakai, long Jun 6, 7 na 8 de.

Na boi ya bilip long PNG i ken kamap na resis wantaim wol long save em Rudolf Yimbang, wanpela kus manki bipo bilong ples ldingai long Sambri Leks insait long Is Sepik provins. Tasol nau save winim em long developim wel palm prodak long yumi yet. Na long nupela tok pisin bilong ol Sepik "save kilim em". Yangpela Rudolf i bin makim Dami Oil Palm Reses Stesin long Wes Nu Briten Provins. Dami karim na litimapim nem bilong PNG long wel palm developmen long olgeta ap bilong ol nau. Yumi mas bilip long yumi, yangpela Yimbang i tok.

Long dasti Sande Jun 7, mi wantaim femili raun i go lukim 1998 Mosbi So long Moitaka. Mipela promis long go hariap tasol na kam bek bikos long apinun bai ol manmeri i pulap pulap na resis na pait long kisim PMV bas i kam bek long siti. Na ol pikinini bilong mi, Nicole 6, Eddie Junior 5, na Ehmee 2 na 1/2 i no amamas. Na ol i laik mipela go bek long haus. Olsem ol bikman meri wok long toktok long skelim 1998 Mosbi So, ol i tok so i nogat planti gutpela samting bilong amamasim mipela femili.

Wanpela samting ol i bin amamas long lukim na bai ol tingtrng

long laip bilong em "Snek So bilong kantri Malesia". Ol i lukim king kobra (poisen snek bilong Asia) laip i kis long man, ol i tok. Na ol askim mi; wanem as tru bilong Mosbi Sod, Dedi? . Na mi sanap tingting liklik pastaim na bekim ol. As bilong Mosbi so na ol arapela so em bilong soim kalsa bilong yumi o gutpela pasin bilong yumi singsing amamas na sindaun belisi wantaim. Na wanem save na samting yumi gat na yumi planim long gaden o fam na mekim long kamapim man bilong kantri na yumi yet. Na i kamap long han na fektori bilong yumi long graun bilong yumi yet long Papua Niugini.

Dispela samting yumi mas soim ol arapela long lukim na lainim na amamas olsem yumi wokim na ken mekim. Na tu long soim na lukim wanem nupela save, teknologi na we long kamapim o developim dispela ol samting i gutpela long helpim developmen na sindaun bilong yumi.


Tasol long bekim toktok bilong mi liklik Eddie i tok, dadi, ating yu toktok long plau, diwai na kaikai diwai, wara na bus samting. Em kaikai na laip bilong yumi. Yumi mas go nau long haus na ples na planim smapela bilong mipela yet bilong bihain, liklik Eddie i tok. Dispela toktok bilong liklik Eddie (4) i mekim mi tingting. Taim mipela i wokabaut i go long go aut long gait long kisim bas na i kam long haus long taun klostu long gait bilong kam insait na go aut em agrikalsa seksin bilong So. Dipatmen bilong Agrikalsa save

putim kamap, na promotim agrikalsa samting bilong mipela. Na long han sut bilong mipela i bin gat wanpela samting i luk olsem drai wel buai (kafifi) i stap long han bilong diwai wel pam. Na wanpela man i kukim na skelim samting olsem wel i stap. Na narapela man i soim reise na developmen seksen. na Eddie lukim pikinini bilong wel pam na singaut askim mipela gen: "Lukim dispela buai o wanem? Em pikinini Sepik ya. Na save kaikai buai olsem ol Sepik tu ya".

Na man ya sanap na wok long eksplenim samting i stap long manmeri i go lukluk long dispela wel pam developmen i lap long liklik Eddie. Na tok: "San, em pikinini diwai bilong wel pam. Em pikinini diwai yumi save rausim na kisim wel bilong kukim kaikai na mekim wel sanda".

Em tok dispela buai yu lukim na toktok i gat namba olsem buai tru. tasol i save kisim mani i kam insait long kantri. I no olsem buai yumi save kaikai i save westim mani na givim mani wansait.

Na dispela man ya em kandre bilong Eddie, Rudolf Yimbang. Na mipela i no save em kam i stap long so promotim save bilong em na wel pam rises na developmen. Yes oil palm i apim nem bilong PNG na long wol. Na yangpela Rudolf em bilong dispela nam-bawan wel pam risets na developmen long Dami long Wes Nu Briten. Na em i tok yumi ki mekim nem insait long wol olsem mipela i kamapim wanpela top kwaliti na fit nating wel palm sidling.



• Rudolf Yimbang sanap wantaim ol kandre bilong em long Mosbi so. Long lephan i go long rait em Eddie, Nicole na Ehmee.

Papua Niugini i salim nau planti wel palm sidling long planti ap bilong wel. Kantri Indonesia baim planti tru pikinini wel pam. Kantri Ostrelia i namba tu. Na kantri olsem India na ol kantri long Saut na Not Amerika i wok long hariap hariap. Yumi stap salim pinis long ol Midel Is kantri. Planti kap bilong wol i luksave long yumi warpela kantri i salim gutpela silding i karim pikinini wel palm i gat planti mit bilong kisim wel. Dispela em gutpela sain na tras long save bilong mipela PNG. Yumi i sem wantaim ol arapela biknem kantri saveman bilong wel pam developmen Rudolf Yimbang i tok. Na em i amamas bilong yumi olgeta olsem PNG top tu long wol.



## PAPUA NEW GUINEA FOREST INDUSTRIES ASSOCIATION (INC)

P.O. Box 229, WAIGANI Phone: 325 9458 Fax: 325 9563

### WOK BILONG FORES INDASTRI I SAVE LUKAUTIM YU O NOGAT?

Takis nau long ol samting we i go ovasis i antap tru, level bilong maket i daunbilo na bikpela prais bilong ol samting bai kamap bikpela long bekdeit bilong fores sas, V.A.T na poret i stap tu long "prosesing takis"

**Dispela i min olsem:-**

- Planti kampani bai pasim wok bilong ol,
- Samting olsem 75% kes moni i go long ol papagaun bai pinis,
- Samting olsem 75 % wok insait long timba indastri bai pinis,
- Kaikai na ol sevis i go long ol-grasruts manmeri bai go daun,
- Ol timba kampani bai i no inap wokim rot na bris ,
- Laik bilong ol investa long mekim wok bai go daun,
- Liklik namba bilong ol nupela investa bai stap long ol eria we i nogat developmen.

**Pasim wok operesin bikos long bikpela moni gavman i sasim na takis ino inap helpim.**

**YUMI FM**

**PNG  
HIT  
PARADE**

**1  
9  
9  
8**

POS.	SONG	ARTIST	STUDIO
WB/LW/TW			
3	1	1	Goipex 105 Wass Kadoi
1	2	2	Kusai Azzimbah
2	3	3	Vada Bolaumu Azzimbah
11	8	4	Tingting Bilong Mi Wass Kadoi
8	5	5	Oh My Dear Pati Doi
6	6	6	Mama Blong Mi Pati Doi
4	4	7	Tingim Mama Bagita Souls
5	7	8	Soldier Boy Noel Asi
0	20	9	Alfie Lister
9	9	10	Goi Medley K-Dumen
10	10	11	Tavurvur Insects
12	12	12 (5)	Dedicate My Love Apprentice
7	11	13	Pacific Island Pati Doi
14	14	14 (5)	Kuti Mangi Robert Oeka
15	15	15(7)	Taurama Beach K-Dumen
16	16	16 (4)	Moraita Robert Oeka
13	13	17	Iau Malari Dirty Beggars
0	0	18	Maupaisa Azzimbah
18	18	19	Karkar Island Robert Oeka
19	19	20	Manam Motu Quakes

**PNG FM PTY. LTD.**  
Trading as  
**NAU FM**  
and  
**YUMI FM**

P.O. Box 774,  
Port Moresby  
Papua New Guinea  
Ph: (675) 320 1996  
Fax: (675) 320 1995

# Demas Saul i kam bek wantaim meri ailan bilong em

**KIWURAM KANAKO** i raitim

LONG Disemba 1993, mi bin stap long Wollongong Yunivesiti long wanela kibung bilong ol asples manmeri bilong ples graun. Dispela kibung em long - Indigenous Peoples Conference on Education. Olgeta taim long nait, taim mi go bek long rum bilong mi, mi save wari olsem mi stap long tru we long ples.

Tasol, wanpela kaset em mi save harim olgeta taim em long namba tri kaset bilong Old Dog and Off Beats. Na singsing 'Hangu Panu' i save bagarapim tru tingting bilong mi. Yes, Demas Saul i bin singim dispela singsing. Na em stail singsing stret. Planti manmeri bilong Madang na arapela provins i bagarap nating long dispela singsing. 'Hangu Panu' tu i stap namba wan singsing long Kalang FM PNG Top-20s.

Nau yet Demas bai lukim gen yau bilong ol manmeri bilong Madang wantaim namba tu kaset albam bilong em - Meri Ailan. Dispela kaset albam bai kam arasait klostu olsem na yupela ol lain husat i save trikol na kus pundaun anting long ol singsing bilong Madang we i kam arasait long Tumbuna Track i mas redi long holim dispela kaset albam. Em i paia lait kaset albam bilong em we i gat ol singsing olsem - 'Swit Mama', 'Tirungu', 'Paino Rarangan', 'Mi Wish', 'Hangu Nui' na planti arapela.

Demas i tok: "Dispela namba tu albam i toktok moa long laip isnait long famili na ol arapela stori we i toktok long apsin pren (love relationship) namel long ol man na meri". Demas i tok tu olsem long namba wan albam bilong em, singsing 'Tirungu' i kamap olsem wanpela strongpela singsing we planti manmeri i save laikim tumas.

Long namba wan kaset albam, ol singsing i stap isnait long tok ples Yabob, Tok Pisin na Inglis. Na tu Demas i bungim ol tokples wantaim. Olsem dispela singsing 'G.I.O.K' w hap bilong em i ron olsem... "how bai mi save... sapos yu stap klostu, klostu long olsem shelter, shelter bilong mi, O.G.I.O.K.

*'Meri Ailan' i stori long pasin pren bilong man na meri we man i stori long wanem samt-ing i bin kamap long em. Na dispela singsing i krai olsem wanpela 'country love song'.*

Tasol long dispela 'Meri Allan', kaset albam, ol singsing i stap long tok ples Yabob na Tok Pisin stret. 'Meri Ailan' i stori long pasin pren bilong man na meri we man i stori long wanem samt-ing i bin kamap long em. Na dispela singsing i krai olsem wanpela 'country love song'. Ating sapos yu harim, bai yu driman olsem yu ron long hos bilong solwara (sea horse/kaimoana) o ating yu ting bet bilong yu we yu driman long en, i stap antap long baksait bilong wanpela bikpela hos bilong solwara.

"Long 1995 yet i kam inap nau, mi luksave olsem ol planti manmeri i laikim 'Meri Ailan' bikos taim miepal is ve go pilai long ol danis ples, ol manmeri i sve kapsait taim ol i harim dispeal singsing," Demas i tok.

Demas i katim 'Meri Ailan' long nupela rekoding masin we i stap nau long Tumbuna Track. Namba wan kaset bilong em, em i katim wantaim olpeal 16 Track Recording Studio. Tu i



Demas Saul insait long studio pilai bes gita. Em wanpela treni enjinia bilong Tumbuna Studio long Madang.

gat medley bilong 'Nimor Wag' em singsing bilong Kales na 'Talie' singsing bilong Old Dog and Off Beats.

Narapela singsing we mi ting bai winim lewa bilong planti manmeri em long 'Tinan Taman Ta' we i stori long wanpela pikinini em papa na mama i

musik bilong Madang i noken bihainim Kales stail tasol, nogat, miela i mas traim na senisim," Demas i tok.

Long namba wan albam, ol singsing bilong Demas i sut long taim we yu ken sindaun na harim isi. Tasol long dispela 'Meri Ailan' albam, ol singsing i bilong kirapim blut na skin na bilong wokim paia na kirapim das long ol pels bilong danis. Ating yumi ken tok ol pati nanun/parti enimols i mas wasaut long 'Meri Ailan'.

Demas i tok olsem ol planti manmeri i redi tasol long pairapim 'Meri Ailan' taim em i kamap long ol stua bilong mipela.

Namba wan albam bilong Demas i kamap long 1995 bihain tasol long Wali Hits na inap long 1998, Demas i wok tasol long studio olsem wanpela session musician na sound engineer we em i helpim na katim ol kaset bilong ol lain olsem Wali Hits (namba tu albam), Pusaris, Sounds of Paramana, Jansh Talad (Boskuru), Wasa Kadoi na Kales Gadagads bihain long Sandie Gabriel i lusim ol.

Demas i tok olsem isnait long tripela yar, em bin stadim ol singsing na musik bilong em logn namba wan kaset na traim luksave long wanem hap tru em bin asua liklik na traim long stretim.

Demas i salim bikpela tok tenkyu i go long papamama na ol lain famili bilong em, Chris Seeto bos bilong Tumbuna Track Studio, Udd Banag long olgeta helpim bilong em na Tumbuna Track Superband husat i bin sapotim em i kam inap nau we em i bin gat sans na taim long katim 'Meri Ailan'.

no laikim na rausim em long famili bilong ol. 'Tinan Taman Ta' i stori long ol asua i save kamap long ol famili bilong yumi tete. Dispela singsing i wankain olsem 'Swit Mama' long namba wan albam bilong em.

'Madang' em narapela singsing we i toktok long gutpela feelings na lukluk bilong Madang we ol manmeri i save gat taim ol i kam na lukim ples Madang yet. 'E.T' em singsing bilong ol manmeri husat i save laik laitim paia wantaim ol - Yau Ro stail, nek bilong singsing em asples Madang stret. Dispela singsing bai skelim yu stret.

Lukaut, nogut yu bai longlong na kalap wansait long liklik trausis bilong yu. Na ol planti pati nanun tu i sve yau gris long dispeal singsing taim mipela i save pilai long ol ples bilong danis.

"Ol toktok long singsing i wankain tasol, mi sensim tasol nek bilong ol. Mi laik traim na senisim liklik ol musik nek bilong yumi. Na dispela i min olem ol





**Nem:** Genevieve Aggrey Fynn  
**Krismas:** 28 (singel meri)

**Adres:** PO Box 1435, Royal Lane, Cape Coast, Ghana.

**Save Laikim:** Bikpela laik bilong mi long rait em

long painim wanpela man bilong prenim na maritim.

Na ol samting mi save laikim long mekim long fri taim bilong mi em lukim piksa, raun na lukim ol nupela ples, na harim kankain musik o singsing.

**Nem:** Mis Josephine B. Hopper  
**Krismas:** 27 (singel meri)

**Adres:** PO Box A-276, Adisaldel, Cape Coast, Ghana.

**Save Laikim:** Ritim buk na ol megasin, raun na lukim ol nupela ples, lukim piksa na kisim piksa long kamera.

**Nem:** Orleans Akosua Lindsay  
**Krismas:** 21 (singel meri)

**Adres:** C/- Mis Elizabeth Aikins, Central Hospital, PO Box 174, Cape Coast, Ghana, West Africa.

**Save Laikim:** Senisim poto wantaim ol pren, kukim kaikai, lukim piksa na singsing. Bikpela laik bilong mi em long painim wanpela man PNG long prenim na maritim.

**Nem:** Jacklyn Malken  
**Krismas:** 15 (meri)

**Adres:** Kunjingini Primary School, PO Box 51, Maprik -ESP.

**Save Laikim:** Harim lokol musik, raitim leta long ol penpren wantaim poto, na tilim tingting na aidia.

**Nem:** Felix Bruce  
**Krismas:** 16

**Adres:** MoraMora Technical School, PO Box 23, Hoskins - WNPB.

**Save Laikim:** Save na mekim pren long ol arapela manmeri, draivim moto kanu raun long Sepik Riva, waswas long wara, raitim leta long ol penpren, na painim wanpela gutpela meri bilong prenim, na bihain maritim.

**Nem:** Lamech T. Zake  
**Krismas:** 19 (man)

**Adres:** C/- Siki Community School, PO Box 214, Finschhafen, Morobe Province.

**Save Laikim:** Go long lotu, harim lotu singsing na musik, raun na lukim ol nupela ples. Mi promis long bekim olgeta leta em mi kisim.

**Nem:** Jackson I Jeneo  
**Krismas:** 18 (man)


**Adres:** PNGCCRI, PMU Section, PO Box 1846, Rabaul -ENBP.

**Save Laikim:** Pilai ol spot olsem volibal, soka, sofbal na basketbal. Mi save laikim tu long mekim fani wantaim ol pren, raitim leta na senisim poto i go i kam wantaim ol pren, ritim Baibel na go long Sande sevis na felosip nait.

**TOKSAVE I KAM LONG EDITA:**

Bekim leta bilong ol meri Ghana long Tok Inglis tasol.

# Dewel meri tanim kamap ston



BIPO bipo tru long taim bilong tumbuna, wanpela lapun man long ples Kamnom long Sandaun provins i go long bikbus wantaim ol lain dog bilong em.

Em go long bus na painim kapul i go na tudak i bungim em. Dispela de em i no laki olsem ol arapela de. Em kilim wanpela kapul tasol.

Em karim kapul ya i go na painim wanpela bikpela ston i olsem haus. Na lapun ya i go insait na sindaun gut tru. Na wok long tromoi tingting i stap. Na em i tok, bai mi slip long dispela ston haus. Na tumora bai mi go bek long ples.

Orait em brukim sampela paiawut pinis na karim i go insait long haus ston. Na mekim bikpela paia stret. Na kukim dispela kapul em bin kilim.

Taim paia i kamap bikpela, smok bilong paia i go nabaut long bus. Na wanpela dewel

meri i smelim smok bilong paia na kam kamap. Na dewel meri i tokim lapun man olsem, bubu, yu lukautim bebi bilong mi na stap. Mi go painim sampela kaikai long bus bai mi kam bek na mipela kaikai.

Orait lapun lukautim bebi i stap na dewel meri ya i tekov. Tasol ol lain dog bilong lapun i no amamas long dispela dewel bebi. Ol i smelim narakain smel long dewel bebi na wok long singaut ba kros nabaut.

Mekim na lapun man tromoi dispela dewel bebi long paia. Na kisim olgeta lain dog bilong em, na long nait yet ol brukim bus i go kamap long ples.

Taim paia i kamap bikpela, em lukim olsem paia kukim pinis bebi bilong em. Em wari

na krai nogut tru. Na kaikai bebi bilong em. Na smelim leg bilong lapun man na dog bilong em i go kamap arere long ples.

Klostu long tulait nau ol manmeri i kirap long ples slip na harim dewel meri ya i wok long krai long bebi bilong em i stap. Na olgeta manmeri kam bung na go long lukim. Tasol sem taim dewel meri tanim na kamap ston.

Olsem na tude sapos yu go long ples Kamnom, bai yu lukim wanpela ston i stap arere long ples.

Em tasol sotpela stori bilong mi.

**Sonny Taken**  
**Kamnom Village**  
**SANDAUN**



## Mi laikim helpim long daunim hevi

Yu stap pinis long rot bilong daunim hevi we yu gat long bel hat kwiktai bikos yu luksave pinis long hevi na antap tu long en, yu luksave olsem pasin long paitim meri i no gutpela samting. Na yu pret pinis long samting i ken kamap bihain-

Wanpela rot we yu ken bihainim long daunim dispela hevi bilong yu em taim yu pilim olsem yu laik pairap nau, orait, traim givim taim long "painim bel kol". Dispela i min olsem taim yu pilim olsem yu kros, kwiktai yu lusim ol arapela lain na yu go long wanpela wokabaut raun yu yet. Yu ken wokabaut inap bel bilong yu i kol na kros bilong yu i pinis. Taim yu wokim dispela na yu wokabaut isi i go bek, bai yu kisim gutpela tingting long sindaun na toktok long wanem samting i mekim yu kros wantaim meri bilong yu.

Sampela krismas i go pinis, Lo Rofom Komisin i bin kamapim wanpela vidio piksa ol i kolim "Stap isi". Vidio piksa ya taim em i autim ol hevi na pasin bilong pait long marit laip, i givim tu ol gutpela rot long bihainim long daunim pasin bilong bel kros na pait. Mipela i askim yu long lukim dispela piksa. Yu ken askim Welfea opis, Lo Rifom Komisin, Pablik Laibreri o

sampela lain insait long komyuniti husat i gat dispela vidio bilong givim yu na yu lukim.

Maski em i hat long wokim, gutpela rot long daunim dispela hevi em long tupela pipel husat i bungim hevi long sindaun na paitim toktok gut. Na pulim tingting long tupela sait wantaim bilong glasim, skelim na daunim hevi.

Taim yu glasim gut ol samting na yu save olsem i no gutpela pasin long yu i belhat hariap na paitim meri bilong yu na ol arapela lain, bai yu save sekim (kontrolim) bel kros bilong yu, maski ol hevi i kamap.

Bai i gutpela moa long toktok wantaim meri bilong yu na askim em long lus tingting long ol bel hat pasin we yu wokim long en na luksave olsem yu bai senis. Na yu laikim helpim long sait bilong em tu.

**LAIPLAIN**



**Dia Laiplain,**

*Mi laikim sampela gutpela helpim long stretim hevi wantaim meri bilong mi, we long wankain taim, mi no laikim pait i kamap.*

*Taim mitupela meri bilong mi i save gat hevi, mi save bel kaskas kwiktai na paitim em.*

*Pasin we mi save bel hat hariap i mekim mi pret. Bai mi wokim wanem long daunim dispela samting?*

**TOUCHY**

**Dia Pren,**

im dispela.

Wanpela samting mipela i ken tokim yu long en em, traim glasim dispela hevi yu gat long kros kwiktai. Dispela pasin i ken kamapim bagarap long bodi bilong meri na tu gutpela sindaun long marit laip bilong yutupela.

Bai yu no inap kamap wantaim gutpela ansa long daunim hevi sapos yu save belhat kwiktai. Tru, yu ken fosim meri bilong yu long wokim samting tasol sapos em i wokim egens long laik bilong em, em bai no nap givim gutpela luksave long yu.



# Bik Bro

# REBO



IGO MOA NEKS WIK!



# SIPAK MAIKY



IGO MOA NEKS WIK!

## Simbu pipel noken sutim Kumul pisin

**Dia Edita,**

Mi no amamas ol man insait long Simbai long Midel Ramu eria bilong Madang provins. Bikos insait long wanwan yia, ol save wokim haus singsing na sutim Bird of Paradise o nesanel Kumul pisin long bilas.

Dispela pisin em i wanpela naispela kala na stail pisin stret insait long kantri. Na em i no pisin nating, nogat. Em i nesanel pisin bilong dispela kantri.

Na kain pasin em sampela man bilong Midel Ramu eria i mekim, mi ken tok em ol man bilong bagara-

pim ol wail abus bilong mipela.

Mi laikim gavman mas putim strongpela lo bai ol kai nman noken sutim dispela naispela Kumul pisin. Wankain tambu mas karamapim tu ol arapela gutpela pisin.

Bikpela pret long ol sot gan em ol ples man i yusim long sutim pisin. Dispela i bagarapim ol pisin. Na tu i raunim ol i go longwe long wail bus. Na dispela i no gutpela.

**William Jambal  
Simbai, MADANG**

## Studen pret long top ap progrem feilim em

**Dia Edita,**

Mi wanpela skul mangi long Kainantu Praimeri skul. Mi mekim gred 7 long dispela skul.

Mi gat liklik belhevi long dispela top ap sistem. Mi wanpela bilong sumatin husat i winim gred 6 eksam. Na nau mi stap long top ap. Tasol mi save painim hat long lainim samting. Bikos i nogat saiens leboretori o klasrum, prektikel skuls klasrum, na tu i nogat agrikalsa gaden.

Olsem na mi save faul long ol dispela sabjek o kos. Nogat ol dispela samting na bai mi kisim save olsem wanem.

Na ol tisa tu, em i no ol tisa bilong hai skul, nogat. Em ol tisa bilong komyuniti skul. Olsem na ol save mekim nating nating long tisim mipela. Sapos mi gat gutpela gif long bihain taim long kantri bilong mi na mi feil, em bai olsem wanem? Olsem na gavman mas plis mekim disisen long

dispela.

I no mi tasol, planti skul sumatin tu sapotim mi. Yu husat studen i luksave long dispela na laik sapotim pas bilong mi, plis mi laik yu mas mekim olsem. Dispela bai opim ai bilong ol bikman long Edukesen dipatmen, na tu ol politisian bilong mipela long mekim sampela samting.

**Elsion Finsch  
KAINANTU**

## Watpo Skate famili go stap long Ostrelia

**Dia Edita,**

Mi wanpela mangi Kuli long Hagen eria bilong Sauten Hailans provins. Mi laik sapotim pas bilong poroman Ruts Kraizi, em bin kamap long Wantok niuspepa bilong Mas 20, 1998.

Em bin komplem long Praim Minista Bill Skate salim famili bilong em i go stap long Kens siti long Ostrelia. Sapos i tru tumas long dispela stori, i luk olsem lida tru i no tingting long mipela. Luk olsem em i save tingting long bel bilong em yet na famili bilong em. Dispela em i no gutpela we long ronim kantri na kamap lida.

Luk olsem em i slip long narapela hap na pekpek long narapela hap.

Na tu, yupela ol Mosbi lain, Skate em bilong Ostrelia tasol yupela i votim em?

Mipela ol hailans na arapela pipel bilong kantri i no wanbel tru long dispela kain pasin em bik lida bilong mipela i mekim.

Dispela em i wanpela sain bilong ol lida bilong yumi i save lus long narapela kantri. Na soim skin tasol long pipel.

**Stanley Gopson  
MT HAGEN**

## Anderson Agiru em top lida

**Dia Edita,**

Mi wanpela mangi Tari long Sauten Hailans. Tasol nau mi stap long Kimbe long Wes Nu Briten provins.

Mi gat liklik komplem olsem na mi rait i kam long niuspepa bai olgeta pipel bilong Sauten Hailans propvin ken lukim na bihainim komplem bilong em.

Mi laik tok olsem

Anderson Agiru em fit memba bilong Sauten Hailans provins.

Liklik taim tasol em kisim ples bilong Dick Mune na planti senis kamap pinis long provins. Olsem na olgeta toktok em bin tromoi long ileksen taim em tru olgeta.

Ol olupela memba save paulim mipela pipel bilong Sauten Hailans na mipela i

no lukim planti senis long provins.

Olsem na yu husat olupela memba i komplem o go long kot long holim bai ileksen, sore tumas long yupela. Yupela noken westim taim. Bikos mipela ol pipel i no inap long votim yupela ya.

**Billy T Hela  
KIMBE**

## Unggai-Bena gat memba o nogat?

**Dia Edita,**

Mi wanpela grassrut bilong Isten Hailans provins. Mi kam stap nau long Morobe provins.

Mi save ritim *Wantok* niuspepa olgeta taim. Na save husat ol memba long Palamen i save mekim toktok na wok. Na save amamas tru long harim. Tasol bikos mi man bilong Goroka, mi interes tru long wok na toktok ol memba olsem Hon Seravo, Hon Karani, na ol narapela save toktok na mekim.

Tasol i luk olsem Unggai-Bena i nogat

memba long Palamen long 1997 i kam inap nau, Jun 1998.

Inap sampela man bekim dispela leta bilong mi long narapela issue bilong *Wantok* niuspepa na tokim mi, husat em memba bilong Unggai-Bena. Na husat em nem bilong em. Na em stap we?

Dispela Mista Unggai-Bena em mas wanpela hait man ya. Olsem na mipela i no save harim nek bilong em liklik.

**Gegusano Pana  
LAE**

## Pater Lak no tingim Kuli pipel

**Dia Edita,**

Mi wanpela mangi Kuli long Westen Hailans provins. Mi save stap long ples.

Nau mi laik autim wari bilong mi long rot em mipela save yusim long go kam long Hagen taun.

Rot bilong mipela i nogut tru. Na Gavana Pater Robert Lak em kot i bin rausim long kot ov disput ritens i bin promis long ileksen taim i olsem em bai wokim gut rot bilong mipela.

Tasol em stap long opis long sotpela taim na kot rausim em. Na i nogat senis yet long rot bilong mipela. Mipela i stap klostu long namel bilong yia nau.

Na tu mipela i bin vot long em. Tasol em i wokim ol arapela ples gut pastaim na putim kolta long rot bilong ol. Na mipela ol pipel bilong Kuli em olsem wanem nau.

Em tasol na husat i laik sapotim o egensim rait tasol na bai mi ritim.

**Stanson K Gopoon  
MT HAGEN**



# NATIONAL HEART FOUNDATION OF PAPUA NEW GUINEA INC

# PLIS NOGAT!

Simuk i ken bagarapim ol bebi na ol liklik pikinini

## NOKEN SIMUK NAU

I tambu tru long simuk klostu tru long bebi na ol liklik pikinini

Dispela toksave i kamaut na kisim sapot bilong moni i kam long National Heart Foundation of Papua New Guinea Inc.

Ol i putim aut dispela toksave long interes bilong pablik lewa helt.

**P.O. Box 158, Mt Hagen, Western Highlands Province.  
Telepon namba 542 2199 Feks namba 542 2384.**

# INVESTMEN KOPORESEN FAN BILONG PAPUA NIUGINI



## 25 YIA

long

**“Wanbel na Lukautim”**

**Julai 1, 1973 - Julai 1, 1998**

“Mipela long Invesmen Koporesen Fan i hamamasim dei bilong kamap bilong mipela. Long 25-pela krismas mipela i mekim planti wok insait long kirapim gutpela sindaun bilong ol wanwan manmeri long Papua Niugini.

**“Mipela bai go moa yet long kamapim gutpela sindaun.”**

Long 1971 Invesmen Koporesen bilong Papua Niugini i bin kamap long baim sea long ol bisnis i stap na wok insait long PNG na bihain salim ol dispela sea igo long ol manmeri bilong Papua Niugini. Long Julai 1, 1973, gavman i kamapim Invesmen Koporesen Fan bilong PNG. Narapela nem bilong dispela Fan em Yunit Trast Fan. Dispela i halivim ICPNG long mekim ol manmeri bilong PNG i kamap papa bilong ol bisnis insait long dispela kantri.

**“Sapos yumi bung wantaim bai yumi i ken kamapim gutpela sindaun.”**

Sapos yu laik save moa, plis rait i kam long: Menesing Dairekta, Invesmen Koporesen bilong Papua Niugini, P.O. Box 155, Pot Mosbi, Nesenol Kapital Distrik. Telepon: 321 2855 Fax: 321 1240

# MUTRUS

# RAGBI LIG NIUS



## Mioks i daun, tasol ino aut yet

### SP Inta Siti kap ripot

STRONG bilong Cambridge Enga Mioks bai kamap long dispela wik Sande long Minj Ragbi lig oval taim ol i bung Mendi Muruks.

Sapos ol i lus, em bai ol i aut long dispela 1998 Sp kap salens we ol i wokim gutpela ran. Mioks wantaim Whagi Tumbe em ol tupela nupela pes long SP inta isti kap salens. Tupela i bin bung long Rebiatul ragbi lig oval we Tumbe i rausim trausis bilong ol mangi Awi 28-22 na skruim ran bilong ol i go antap na bai bungim wan Kantri Cambridge Mt Hagen Eagles. Husat i winim dispela bai wet tasol dei bilong gren fainel. Husat i lus bungim husat i win long gem bilong Muruks na Mikos.

Eagles na Tumbe pilai bai kamap long Lae Ragbi Lig oval. Eagles husat i malolo long las wik bai pilaim Tumbe. Eagles i malolo long las wik bai pilaim Tumbe. Eagles i ran namba wan long dispela 1998 SP Kap salens na tu ol i kisim maina primiasip.

Mioks i bin daun tasol i no aut yet. Dispela wiken pilai em las sans bilong ol long soim sapos ol i min long winim dispela kap o pilaim gren fainel. Wanem liklik strong ol i gat em bai ol i rausim long dispela Sande na traim long krungutim het bilong ol Muruks.

Muruks, husat i bin smelim kap na drink pinis long em bai mekim olsem ol nupela lain Awi ino ken rausim ol. Ol bai soim sem strong long las wik sande ol i wokim we ol i rausim bom bilong LBC Lae Bombers long Goroka Danny Leahy oval, 30-18 long ekstra taim.

Mioks i no gat ol nem pilaia olsem Muruks. Tasol em i gat ol mangi we inap holim win paip bilong mangi long Muruks. Mioks bai beten olsem olpela Kumul na Lae Bombers Robert Tela na olpela Rabaul Gurias na Simbu Warriors Stanis Kale bai lukautim ol beklain.

Long fowet kepten Thomas Nena long prop bai soim ol mani long ples fowet, liklik long sais tasol ol i no nupela long pilai ragbi. Olsem na bai ol i rausim olgeta win bilong ol long dispela wik Sande. Sapos ol i win, ating gren fainol em bilong ol. Muruks i gat sampela ol nem pilaia husat i gat eksperiens na sapos kosa Bobby Ako i putim ol long rait posisen, ol bai bagarapim pait bilong awi. Muruks i bin winim dispela kap long 1996, tupela krismas i go pinis. Stail bilong ol long dispela pilai in o lus ting yet-em i stap long blut. Maski ol i no ran long fainels las yia, nau ol i gat sampela kain plen-long kisim dispela kap igo na bilasim tente oval.

Ainman Raymond Karl bai go pas long fowet wantaim sapot bilong Joe Mek na Cedric Kengi. Beklain em bai stap long han bilong Kumul na fulbek Ruben Ruing, Anton Mal an Timon Mosembuya long hapbek. Ol i gat moa eksperiens olsem na tupela i rausim ol mejik bilong B52 bombers. Dispela spirit i stap yet so wankain so bai ol, putim gen dispela wik Sande.

Long narapela pilai, Eagels i luk olsem feveret long Tumbe na bai wet long gren fainel. Long wanem kepten Max Tiri, David Gomia, Chris Itam James Kops, Stanley Sukot na John Pawa i save wanem as na pes gem ol i bin lus long Tumbe long Minj.

Tumbe i no wari, em i bin skelim bun bilong Eagles pinis na long bungim ol namba tu taim i no bikpela samting. Aninit long eksperiens bilong olpela Kumul Goiye Waine, olpela Hagen Eagles pilaia John Passangan, olpela Goroka Lahanis James Koronam bai pasim tok long soim ol narapela wan pilaia logn kisim dispela SP kap long Hagen taun na go haitim long Whagi Mek plentesin.

## Norths bagarapim sindaun bilong Brothers

### PAULUS TALI i raitim

OLPELA faiv-et bilong Madang Marlins Lawrence Gandi i go pas long Norths long memeim stret Brothers 18-8 insait long bikpela ragbi lig resis long Ron Albert Oval long Madang las wiken.

Norths em tim bilong ol studen long Madang Tisas Koles, Divain Wot Yunivesiti na ol asples Riwo.

Olpela fulbek bilong Noten Zon Boston Jack i kosim dispela tim insait long Madang ragbi lig kompetisen.

Ol boi Norths i no westim taim. Samting olsem 15 minit bilong pilai, winga Roddy Begg i brukim kiau na skoa i sanap 4-0. Tasol bihain long 25 minits, Brothers i

### Madang Ragbi lig ripot

bekim wantaim wanpela gutpela trai. Na skoa bilong tupela tim wantaim i dro 4-4. Ol i wok long pilai yet na kepten bilong Norths Gandi i putim wanpela senta trai. Kik long konvesen i go insait na skoa i sanap 10-4.

I no longtaim ol Brothers i tingting planti na salim bikpela fowat Mathias Tutunge long skoa. Barnabas Nalong i abrusim konvesen na skoa i sanap 10-8.

Samting olsem 10 minit i stap long namba wan hap, huka bilong Norths Terence Hoot i mekim gutpela ran go stret na putim trai na surikim skoa bilong Norths i go long 12-8. Dispela skoa i go inap hap taim. Kosa bilong Norths Boston i mekim

strongpela toktok long haptaim. Olsem na taim ol i kambek long namba tu hap, ol i blokim olgeta rot bilong Brothers long putim trai.

Ol i no givim wanpela spes liklik, nogat. Ol i putim umben na pasim olgeta rot bilong ol boi long Hailens long skoa. Liklik huka bilong Nots gen Hoots i ran namel long tupela difenda bilong Brothers na go putim wanpela trai long hapim skoa i go long 16-8. Brothers i gat wanpela penalti na ol boi Norths i kikim na skoa i go 18-8 inap fultaim. Insait long arapela gem, Hawks nekim Royals 24-18, Panthers autim tiket bilong Tigers 20-14 na Tarangau em bai. Point lata bihain long las wik: Hawks 14, Brothers 9, Norths 8, Tigers 6, Tarangau 4, Panthers 4 na Royals 2



• Winga bilong Enga Mioks i givim siksti long trai lain. Boi ros bai wokim wankain stai long dispela wiken egensim ol Mendi Muruks.

## Tumbe autim Mioks

WAGHI Tumbe i autim tiket bilong Cambridge Mioks 28-22 long bungim Cambridge Mt Hagen Eagles long semi fainel bilong inta siti long dispela wiken. Em i namba wan yia bilong tupela tim long pilai long inta siti. Tasol ol i pilai olsem ol biknem tim we moa long 10,000 pipel i bin kamap long lukim dispela gem. Dispela gem i bin kamap long Rebiatul oval long Mt Hagen yet.

Tumbe i putim namba wan poin taim Ma Wus i kikim wanpela konvesen. Orait bihain long em olpela pilaia bilong Mt Hagen Eagles Thomas Tumbe i putim wanpela trai gen. Dispela trai i kamap bihain long gutpela pilai namel long ol fowat na skoa i go sindaun long 6-0.

Tumbe i wok long kamapim gutpela bal wok na i wok long brukim difens bilong Mioks. Ol i wok long pilai yet na bikpela winga Tony Kui i brukim difens na setim senta Ma Wus long putim skoa bilong Waghi i go long 10-0. Ol Enga i kapsait long Mt Hagen taun. Ol i kam long lukim tim bilong ol i win. Kepten bilong Mioks Thomas Neah i pilaim wanpela gutpela gem stret. Em i wok long go pas long fowat long brukim difens bilong Tumbe.

Hatwok bilong em i karim kaikai taim emi brukim difens na setim fowat bilong em Billy Morrison long putim trai. Tasol Robert Tela i no kikim konvesen na skoa i sanap 10-4. Dispela skoa i go inap long hap taim. Long namba tu hap,

hapbek bilong Tumbe Daniel Ape na Gideon Kombukun i poroman gut tru long kamapim gutpela pilai stret. Tupela i setim huka John Passangan long apim skoa i go long 14-4, na gutpela konvesen kik bilong Wus i surikim skoa i go long 16-4.

Mioks i gat planti sans long putim trai. Tasol ol yet i abrus na i no yusim gut bal long skorim trai. Fulbek bilong Mioks Iki Naputu i putim wanpela tru taim tupela hapbek Stanis Kale na faiv et Jacob Kipongi i setim em long movim skoa bilong ol i kam long 16-8. Jackson Mond, wanpela strongpela winga bilong Tumbe i brukim difens na setim Daniel Ape husat i kisim bal na ran i go long tromoi bal i go long Ma Wus long apim skoa bilong ol i go long 22-8.

Tasol ol Miok i no wari. Ol tu man ya. Ol i wok long pilai yet na wantu tru ol i putim tupela trai muvim skoa i kam klostu 22-16. Riserv fowat Thomas Awi i putim wanpela pilai long las 10 minute na Wus i kikim konvesen long apim skoa i go long 28-16.

Tasol long las minit, ol i no was gut na faiv et bilong Mioks Robert Tela i go putim las trai long apim skoa i go long 28-22. Bernard Otto, James Koronam Ravian Karpal i pilai gut tru long fowat bilong Tumbe na Nathan Piso i paia stret long beklain bilong Mioks. Dispela win bilong Tumbe nau bai helpim ol long bungim kange bilong ol yet Mt Hagen Eagles.

# MUTRUS

# Ragbi Lig Nius

**DRO NA POIN LATA**

**PORT MORESBY RUGBY LEAGUE**

Magani 24 d Defence 20, Hawks 22 d Post Puma 20, Brothers 20 f West O, Dobo Warriors 22 d Souths 20, Kone Tigers 22 d Waliya, 18, Paga Panthers 30 d Gerehu United 19, Tarangau 26 d Royals 10.

Team	P	W	D	L	F	A	P	T
Paga Panthers	13	11	0	2	426	245	22	
Post Puma	13	9	0	4	300	228	18	
Hawks	13	9	0	4	312	275	18	
Kone Tigers	13	8	1	4	297	235	17	
Royals	13	7	1	5	316	273	15	
Tarangau	13	7	1	5	309	272	15	
Souths	13	7	2	4	310	284	14	
Defence	13	6	1	6	342	307	13	
Dobo Warriors	13	5	3	5	256	251	13	
Magani	13	5	2	6	294	306	12	
Gerehu United	13	5	1	6	294	292	11	
Waliya	13	3	3	8	357	363	9	
Brothers	13	1	1	1	151	281	5	
West	13	0	0	13	204	502	0	

2 Competition points deducted for playing a suspended a player.  
2 Competition points awarded for successful appeal refiled a suspended player by Security club.

**SP CUP**

**RESULTS 21st JUNE**

Waghi Tumbe 28 def Enga Mioks 22  
Mendi Muruks 30 def Lae Bombers 18

**MAJOR SEMI FINAL - SUNDAY 28TH JUNE**

Mt Hagen Eagles v Waghi Tumbe in Lae Ref: L. Metta  
Enga Mioks v Mendi Muruks in Minj Ref: S. Fareho

**KIUNGA LEAGUE**

Waliya 15  
Cowboys 14  
Tigers 9  
Panthers 4  
Raiders 4  
Hawks 0

Two points deducted from Hawks and tiven to Panthers based on an successful appeal. Hawks played an unregistered player in a recent match.

**LAE TOUCH ASSOCIATION**

June 27, 1998.

**Under 17**

1.00pm	1 vs 11	1
	3 vs 5	2
2.00pm	2 vs 4	1
	10 vs 12	2
3.00pm	9 vs 13	1
	7 vs 8	2

**Senior/Open Games**

June 28, 1998.

12.00pm	9 vs 13	S/M	1
	1 vs 11	O/W	2
	9 vs 13	O/M	3
1.00pm	7 vs 8	S/M	1
	3 vs 5	O/W	2
	7 vs 8	O/M	3
2.00pm	2 vs 4	S/M	1
	10 vs 12	O/W	2
	2 vs 4	O/M	3
3.00pm	3 vs 5	S/M	1
	7 vs 8	O/W	2
	3 vs 5	O/M	3
4.00pm	1 vs 11	S/M	1
	2 vs 4	O/W	2
	1 vs 11	O/M	3
5.00pm	10 vs 12	S/M	1
	9 vs 13	O/W	2
	10 vs 12	O/M	3

**Club Names and Numbers**

- 1 Salamanda
- 2 Eriku Grips
- 3 Coronation
- 4 3M Warriors
- 5 Dom
- 7 Bundi Giants
- 8 Gobar
- 9 Bees
- 10 Lae Battery Services
- 11 Sikambu
- 12 Bumngang
- 13 PC Bullets

**Hiros sempionsip i strongim ol hailens tim**

HAILENS Hiros ragbi lig i helpim tru ol tim insait long hailens rijon long stap insait long fainel bilong SP inta siti long dispela yia.

Ol bikman bilong ol tim Max Kanamon (Mt Hagen Eagles), Kundapen Talyaga (Enga Mioks), Luke von Boehm (Waghi Tumbe) na Yakumb Pinpin (Mendi Muruks) i apim tru nem bilong dispela kompetisen we i redim tru ol tim long inta siti.

Kanamon i tok " I tru olsem

mipela i sempion, dispela ol helpim mipela i kisim long Hiros sempionsip i helpim tim long redim em yet long SP kap."

Luke vo Boehm i tok "Dispela hiros kompetisen i helpim tim bilong em na Mioks long stap insait long fainels."

As tingting bilong dispela resis em long wokim mani bilong draut insait long Hailens na tu helpim ol tim i redi long SP Kap.

Operesen menesa bilong Hiros Ragbi Lig sempionsip Alphonse Pu Wills i givim gutpela sapot na ol komiti bilong em i mekim wok.


"Hiros i wokim K58,000 na dispela olgeta mani, komiti bilong em i givim i go long Nesenel Draut Rilif Komiti long Mosbi," Pu i tok.

Pu i tok em i salim plen i go long olgeta Hailens Provinsal Gavman na tu PNGRFL na ol wanwan tim long painim aut

we kompetisen bai ran yet o nogat long neks yia na bihain taim.

Aninit long plen ol liklik senta tu resis longnamba wan raun. Orait bihain long dispela tupela top tim bai go insait long namba tu raun wantaim ol arapela 6-pela senta husat i joinim Hiros sempionsip las yia.

Lae Siti Bombers na Ramu Crusher tu bai joinim ol. Ol komiti i bin askim dispela tupela senta.



• Pilaia bilong Paga Valerian Hakeria i givim siksti na aburusim ol pilaia bilong Gerehu.

**Minj statim namba tu raun**

**ROBERT BOMA i raitim**

Minj Ragbi Lig i statim pinis namba tu raun bilong sisen proper long las wiken.

Bikpela gem i bin kamap namel long Minj Wests na Bukamail Spiders. Wests i moa yet na winim Spiders.

Arapela gutpela gem em namel long Brothers na Kubor United. Ol Brothers i bin kamapim gutpela gem stret na dro wantaim United 22-22.

United em i namba wan long skoa 5-pela minit go insait long gem. Dispela trai i kamap bihain long gutpela gem long lukim senta Bobby Kos i go putim trai.

Brian Jimben i kikim konvesen na skoa i sanap 6-0.

Ol i pilai i go yet na Bobby ken i go putim namba tu trai bilong United na Brian i kikim konvesen long apim skoa i go long 12-0.

Tasol ol Brothers i no wari. Ol i pilai i go igo na putim wanpela trai. Peter Kaima i no kikim gut konvesen na skoa i sanap 12-4. Ol Brothers i putim arapela trai gen na daunim skoa i kam daun long 12-10. Dispela skoa i sanap i go inap hap taim.

Long seken hap, tupela tim wantaim i plai gut tru. Ol i wok long strong na traim long brukim difens bilong ol birua bilong tupela.

United i putim tupela trai gen long surikim skoa bilong i go long 22 poin. Ol trai i kam yet long Mek Peu na Bobby Kos. Em i namba tri trai bilong Kos.

Brothers i bekim dispela tupela trai i kam long John Nuku na Bak Boma. Dispela i apim skoa bilong ol i go long levelim skoa 22-22.

Boma, Gilpip, Poipoi i pilai gut tru long strongim Brothers na Justin Yuants, Toby Muki, Ken Goiar na Bobby Kos i wok ovataim long helpim United.

Presiden bilong United Joel Kem i no amamas long win bilong Brothers bikos tripela pilaia i no putim su na pilai. Kem i askim komiti long rausim tu poin na givim long tim bilong em.

Em i tokim Wantok olsem Minj Ragbi Lig em wanpela liklik senta we PNGRFL i luksave. Na em i no wanpela viles kompetisen we ol pilaia i no putim su.



• Dabema bilong Waliya sapatim poro bilong em long stapim Tigers

# Sori tumas Lahanis, traime gen neks yia

## SAPE METTA i raitim

SORI TUMAS Lahanis, stap isi nau na traime gen neks yia. Dispela hap tok ating bai sutim tru lewa bilong ol sapota na pilaia bilong Goroka Lahanis.

Tingting bilong Lahanis long pilai long 1998 inta siti fainel i popaia. Lahanis i lusim sans bilong ol taim ol i lus long Enga Mioks na i no longtaim ol i lus gen long Kimbe Bulls.

Dispela tupela gem em i bikpela gem long winim poin. Tasol ol boi Lahanis i no pilai gat tumas na ol i lus.

Ol Isten Hailens i no redi gat long pilai long inta siti bihain long indai bilong Tuiyo Evei. Planti man bai toktok olsem dispela tok o ripot i no tru. Tasol pasin bilong Isten Hailens i narakain.

Lahanis inap askim PNGRFL long malolo long wanpela yia.

Long gutpela taim na taim nogut bilong Lahanis i save kamap bikos Tuiyo Evei i stap. Ol Isten Hailens i save soim strong bilong ol long bihainim husat i gat nem na glori. Dispela samting

em i bikpela long hailens.

Tuiyo Evei i gat nem long spot. Na dispela i save kamap wankain long ol arapela wok olsem sios, bisnis na tu kampani.

Evei em i no wanpela lida nating. Em i wanpela man em planti man i save luk antap long em olsem god ya. Planti ol pilaia nau long Lahanis i save bihainim lek bilong em taim ol i mangi.

Dispela i kamap olsem bilip olsem Tuiyo em save holim strong bilong Lahanis. Sapos em i nogat, Lahanis em samting nating. Sapos Lahanis i no gat Tuiyo em nating. Em i wankain olsem Isten Hailens i nogat Sir Danny Leahy.

Em i taim nau Lahanis i stat long luksave long yangpela na givim sans long ol long pilai inta siti. I gat planti risen na watpo Lahanis i no pilai gut. Dispela em i samting bilong wanwan pilaia na opisel long skelim.

Lahanis i mas stat long plenim program bilong em neks yia. Sapos em i stat nau, em bai karim gutpela kaikai long dispela yia.

Inta siti tim long Hailens i no pilai gut bikos planti ol pilaia i nupela. I gat wanwan ol olpela pilaia i stap long saptim ol pilaia ya.

Lahanis tu i gat nem long winim inta siti kap. Ol i autim tiket bilong Mosbi Vipers long 1993. Long 1994 ol i go pilai long gren final na lus, long 1995 ol i pilai long semi fainels na long 1996/97 ol i stap las long poin lata.

Dispela sisen long 1998 i no gutpela tumas long ol Lahanis. Ol i no winim planti gem olsem na ol i aut.

Ol nupela tim i kam joinim kompetisen na dispela i soim tru olsem resis long winim fainel bai hat tru.

Ramu Crushers, Kimbe Bulls, Enga Mioks na Waghi Tumbe em ol nupela tim. Tasol ol i wok long wokim nem long dispela semi profesenel ragbi lig kompetisen ya.

Tumbe na Mioks i winim spes long fainel. Olsem na ol bai brukim bun long Lae long dispela wiken.



• Antap: Fowat bilong Gerehu Yunaited John Wamoro i apim han olsem em i nap. Sapos nogat iau bai pairap ya.

• Lephan: Michael Marum bilong Paga Panthers i redi long takolim pilaia bilong Gerehu Yunaited.

## Okul joinim seken divisen klap, Dragon

### ALPHONSE PU i raitim

OLPELA senta bilong PNG Kumul nau i pilai long Doncaster Dragons long seken divisen kompetisen long Inglan.

Las wik Okul i putim tupela trai na nem bilong em i kamap long FASDA tim bilong wik. Dispela tim em ol biknem pilaia, niusman na ol opisel bilong ragbi lig i save makim olgeta wik.

Bipo Okul i save pilai wantaim Stanley Gene long Hull Kingston Rovers. Tasol klap i lusim Okul na em i joinim nupela klap.

Boi Simbu ya i no save winim posisen long pilai long Hull bikos long ol liklik bagarap i kamap long skin bilong em. Olsem long nupela klap, dokta i tokaut olsem em i orait na em i bin pilai.

Las wik Sarere em i pilai strong tru long posisen bilong em long senta na skorim tupela trai.

Ripot long website bilong Dragon klap i tok olsem "Dispela PNG star Okul i brukim ol difens bilong Beatly na skorim trai insait long 10 minit.

"Strong bilong Okul i helpim em long putim tupela trai na em i kamap olsem wanpela biknem pilaia long dispela eria."

Long olpela klap Okul i save stap riserv na sampela taim em i save pilai long wing. Dispela posisen em i no save gut tumas ya.

I tru tupela trai bilong Okul i no laki tumas. Ol birua ol, Beatly i kam bihain na go winim Dragons 28-22.

Na wantok bilong Gene i wok long sanap long ai bilong judiseri tupela taim nau. Ol referi i bukim em long ol liklik asua i kamap long ragbi fii.

Tasol em i kamapim gutpela pilai putim tupela trai long helpim nem bilong em i kamap top trai skroa.



## Tupela tim bilong Westen Hailens yet

TUPELA tim bilong Westen Hailens yet, Waghi Tumbe na Cambridge Mt Hagen Eagles bai salens long lukin, wanem tim bai redi long gren fainel.

Wanem tim i lus bai i gat seken sans long bungim wanem tim i win long gem namel long Mioks na Muruks.

Bikpela tingting bilong Eagles em long winim gen taitel. Las yia, ol i winim dispela taitel na bai strong gen long holim gen.

Eagles bai go insait long dispela gem olsem feveret tim

long win. Tasol ol wantok bilong ol long mid Waghi Veli, Tumbe bai traime tasol long skelim strong bilong dispela ol boi long Hagen siti.

Kosa bilong Eagles Simon Moi bai strong long Stanley Sukot, Chris Itam, David Gomia na James Kops long beklain.

Long fowat, Moi i gat ol biknem pilaia olsem kepten yet Max Tiri, Elias Kamiak na Andrew Kanamon.

Eagles i gat eksperiens long winim dispela gem.

Long sait bilong Tumbe, tupela man i holim ki bilong win. Dispela tupela pilaia em Gideon Kombukun na Daniel Ape.

Planti ol sapota i save olsem sapos dispela tupela pilaia i no stap, ating Tumbe bai i no inap go long fainel. Ol i save mekim ol biknem pilaia paul olsem ol liklik skul manki long pilai graun.

Las wik ol i soim stail taim ol i autim Enga Mioks.

Tumbe i gat olpela pilaia olsem Goiyee Waine, Thomas

Tumbu, Jackson Mond, Ima Wus long beklain. Long fowat em James Koranam, Raiven Karpal, Frank Kaman na Benard Otto.

Olpela pilaia bilong Eagles John Passingan i joinim ol asples bilong em. Na dispela i soim olsem Eagles bai painim hat bikos em i save long wanem ol trik kosa Moi bai yusim.

Sapos Eagles i luk daun na laik pilai kaskas long Tumbe, Tumbe bai win. Sapos nogat, Eagles bai bukim namba wan spes long gren fainel ya.

# Malum i makim Muruk long gren fainel

KOSA bilong Lae Bombers Steve Malum i makim Mendi Muruks long bungim Mt Hagen Eagles long gren fainel.

Malum i mekim dispela tok-tok bihain long Muruks i autim wilwilim tim bilong em, Bombers long 30-18 long ekstra taim. Long fultaim tupela tim wantaim i dro 18-18.

Long Lae, Muruks i putim tupela trai long winim Bombers. Dispela i soim olsem ol Muruks i redi tru long brukim bun long winim SP inta

siti kap ya. Long ekstra taim, winga bilong Muruks Petrus Thomas i opim skoa namba wan hap na long namba tu hap, em Willie Gabriel i putim trai. Ol sapota bilong Muruks wantu tru i go na apim kosa Bobby Ako.

Ako i tok em i amamas tru na em i no save wanem samtling em bai toktok long en.

Long bikpela pilai, winga bilong Bombers i abrusim mak bilong putim trai. Olsem na Muruks i yusim dispela na

salim kepten na fulbek Ruben Riung long putim namba wan trai bilong ol. Skoa i sanap 4-0.

Tasol Lae i no wari tumas. Ol i pilai i go na winger Philip Ericke na Eddie Maun i putim trai long go pas long skoa 8-4. Tasol bihain long em, Mendi i kirapim paia. Raymond Karl, Gabriel i putim wanpela wanpela trai na skoa i go long 16-8 i go inap long haptaim.

Kosa Malum i kamapim sampela strongpela toktok na dispela i stapim Muruks long

skoa ya. Ol Bombers i putim strongpela difens stret.

Ol mangi long Lae i putim tupela trai. Ol trai i kam long Andrew Pora na Tony Dai long bo pas long skoa 18-16. Ol Lae redi tasol long win, tasol huka bilong Muruks Gabriel i kikim tupela field gol na tupela tim i dro 18-18.

Kosa Malum i sutim tok i go long sinia referi bilong Mosbi Sari Fareho long i no mekim gutpela wok referi na Bombers i lus.

## LAE RUGBY LEAGUE DRAWS

Senior Round 11  
Juniors Round 7  
SP Cup Major Semi Final

### Saturday, June 27, 1998

**Outside Ground**  
9.00am U19 Panthers v Tigers  
10.00am U19 Defence v Tarangau  
11.00am U19 Brothers v Magani  
12.00noon U19 Spiders v Royals

**Inside Ground**  
9.00am B Brothers v Magani  
10.20am B Spiders v Royals  
11.40am B Panthers v Tigers  
2.00pm B Defence v Tarangau  
3.20pm A Brothers v Magani

### Sunday, June 28, 1998

**Outside Ground**  
9.00am U17 Panthers v Tigers  
10.00am U17 Defence v Tarangau  
11.00am U17 Brothers v Magani

**Inside Ground**  
9.00am U17 Spiders v Royals  
10.00am A Spiders v Royals  
11.40am A Panthers v Tigers  
1.20pm A Defence v Tarangau  
3.00pm SP Cup Mt Hagen Eagles v Whagi

Tumbes	Gate Fees	Saturday	Sunday
Adults		K1.00	K5.00 (over 12 years)
Kids		50t	K2.00 (up to 12 years)

## Poin lata i no senis

### ... Paga bosim yet Mosbi Lig

**HENRY MORABANG**  
i raitim

PAGA Panthers i holim yet namba wan spot long poin lata bilong Pot Mosbi Mutrus Ragbi Lig las wiken. Paga i wilwilim Gerehu Yunaited 30-18.

Maski Stanis Bai i pulim ol biknem pilaia i go long Australia, Tuksy Karu husat i kambek gen wantaim ol boi bilong em i soim stret olsem Paga Panthers i no inap lus.

Karu, Terry Longbutt, Michael Marum na Nick Andy i bin go pas long dispela gutpela pilai stret ya.

Gerehu Yunaited i gat ol pilaia olsem Warren Vele, John Wamoro na Joe Sipa, tasol ol i nogat gutpela sapot pilai long daunim biknem Panthers. Dispela win i helpim Panthers long holim strong top spot long lata.

Hawks i soim strong tru olsem ol i gat laik long salens long primiasip taim ol i stapim Post Puma mov i go klostu long Paga 22-20.

Ol biknem pilaia Heni Owen, Pipi Gari, Poki Kohu na ol arapela biknem pilaia i kambek gen long strongim Hawks long win.

Ating i no laki de tumas bilong ol boi bilong Alex Tondopa. Ol i mas go trening gut gen na kambek long dispela wiken.

Magani i daunim olgeta sem bilong ol taim ol i winim biknem Difens. Pawa bilong Difens i go we nau. Olgeta biknem pilaia i mas dai pinis o olsem wanem.

Difens i gat Sebastian Maguna, Steven Soki, Ben Lentrut, George Kele, Clement Marisa na Ronald Vue long go pas long tim.



• Senta bilong Paga Panthers Andy Noah i laik brukim difens bilong Gerehu Yunaited.

Kone Tigers i winim Waliya 22-18. Dispela gem i wanpela strongpela tru tasol eksperiens bilong Stanley Haru na Aquila Emil i wok long helpim tru dispela tim long winim ol gem ya.

Dispela win i tok lukaut long ol strongpela tim olsem sapos ol i no was gut, ol bai kisim taim ya.

Long sait bilong Waliya, em wanpela masof o poisin man Michael Toivita bilong Lesse Avihara i wok long go pas long tim bilong ol boi Daru. Em i wok long kisim gutpela sapot pilai stret long ol fowat bilong em.

Dobo Warriors i daunim strong bilong Souths 22-20. Dispela gem i no gutpela tumas bikos ol pilaia bilong Souths i no pilai ragbi. Planti bilong ol i tingting long bagarapim ol arapela pilaia. Planti ol sapota husat i lukim dispela

pilai i no amamas tumas long pilai nogut bilong Souths.

Hapbek bilong Dobo Maino Geno em man husat i go pas long dispela win. Kosa Francis Rochus i no amamas tumas long dispela bikos planti ol pilaia i pret na i no pilai gut tumas ya.

Em i tok sapos referi i strong liklik, ating dispela gem bai kamap gut ya.

Brothers i laki long winim isi poin long Wests. Ol Wests i no bin putim wanpela tim long pilai salensim Brothers olsem na ol i kisim tupela isi poin stret ya.

Kosa Sam Kaia na kepten Robin Kafie na tu sapota Robert Akunai i mas tok tenk yu long Wests. Sapos Wests i kamap long gem, ol bai winim Brothers long kisim dispela tu poin ya.

Tarangau i mekim strongpela tok lukaut pinis long ol arapela tim taim ol winim Paga las wik. Dispela wik, ol i mekim wankain pasin taim ol i autim tiket bilong wanpela strongpela tim Royals 26-10.

Kosa Joe Madidu i no apim nem bilong tim. Em i tok ol bai wokim wankain pilai i go inap long taim bilong fainel.

Madidu i tok em i amamas tru bikos planti ol pilaia i mas hepi long ol arapela pilaia olsem Billy Kambao, James Naipao na Mek Gele husat i save pilai long Mosbi Vipers i joinim tim gen.

Kambao em wanpela fowat husat bai wokim tru nem sapos ol selekta i givim sans. Em i save savolim ol arapela pilaia olsem buldoza na tu em i gat stall long autim bal taim ol i takolim em.

## Dobo kilim paia bilong Souths long Anda 19

**LIONEL YOGOMIN** i raitim

OL boi Dobo Warriors i kilim dai paia bilong Souths taim tupela tim wantaim i bung long Anda 19 resis long las wiken.

Dispela gem i lukim tupela wantaim i no sis long soim strong bilong ol.

Referi i no amamas long pilai bilong ol na salim tupela pilaia i go long 10 minit sin bin.

Tupela pilaia em senta bilong Dobo Warriors Nike Belo let takol na Thomas Agibe long hai takol.

Hapbek bilong Dobo Warriors Reuben Kaola, faiv et Russell Eddie na huka Steven Au i lukim Souths i strong long namel na ol i stat long kikim bal long banis bilong ol.

Taim Souths i kisim bal na i kam, ol i gurua na lusim bal na lok fowat bilong Warriors Waigae Balau Dick i kisim bal na skorim trai ya.

Namba tu rowa Taku Bani i no abrus na kikim stret konvesen long kisim skoa bilong Warriors i go long 6-0.

Ol boi Souths Tuya i no harim tok na ol i kambek strong wantaim masof mari Ruben Timu, Thomas Hagoge, Joe Wepo, Gibson Pius na Hali Tumbi.

Tasol ol boi Koari ol i no pilai pilai long ol na ol makim save stret long takol.

Bani kikim wanpela penalti gol taim ol Souths i wokim wanpela asua na dispela i helpim Dobo Warriors long go het long 8-0.

Insait long arapela gem, Philip Lauwsewa wantaim ol boi Royals i memeim stret Tarangau 24-0, Paga winim Gerehu Yunaited 1-0, Kone Tigers win 26-16 egens long Waliya, Brothers daunim Wests 14-8, Difens nekim Magani 4-0 na long bikpela gem, Post Pumas i daunim Hawks 24-16.



# Chile bai bungim Brazil long namba tu raun

## CHILE NA CAMEROON DRO 1-1

CHILE, wampela liklik kantri long Saut Amerika bai go insait long namba tu raun bilong Wol Kap bihain long em i dro wantaim Cameroon 1-1. Dispela em i namba wan taim bihain long 28 ya olgeta, ol Chile i go insait long namba tu raun bilong Wol Kap.

Dispela dro i mekim ol Chile bai salensim ol wantok bilong ol yet long Saut Amerika, Brazil long namba wan gem.

Cameroon i nap win tasol referi i no oraitim wampela gol i bin kamap bikos em i ting i gat faul pilai i bin kamap.

Kosa Claude Le Roy Cameroon i tok em i sori bikos ol i autim tim bilong em long samting em i no mekim.

Gol bilong Chile i kamap bihain long straika Jose Sierra i kikim bal i

abusim 5-pela difenda na go insait long mak.

Cameroon i nidim win long go insait long seken raun. Tasol Rigobert Song i kisim ret kat taim em i paitim sta fowat Marcelo Salas long pes. Chile i bekim gol taim Patrick Mboma i kalap abusim Pedro Reyes na hetim bal abusim golkipa long hetim dispela dro gol.

Ol opisel bilong Cameroon i mekim ol samting tok kros long referi Vagner. Le Roy yet i krosim presiden bilong FIFA Sepp Blatter husat i bin kamap long lukim dispela pilai namel long Cameroon na Chile.

Kosa bilong Chile Nelson Acosta i tok em i amamas bikos ol gem i no bin kamap gut bihain long dispela pul.

Dispela dro, na Itali i winim Austria 2-1 i larim Itali i stap long namba wan ples na Chile i sindaun long namba tu

ples. Chile i go insait bihain long tripela dro.

Dispela kantri i bin kisim bikpela mekim save long FIFA long las Wol Kap bikos golkipa Roberto Rojas i giaman long kisim bagarap long 1989 kwalifaia egens long Brazil, na dispela i larim stret wol sempion long winim dispela gem.

Chile bai bungim Brazil long Sarere.

Kosa Acosta i tok olsem dispela gem egens long Brazil bai wampela strongpela stret. Acosta i tok em i tok tru olsem dispela gem bai hat, tasol ol Brazil bai painim taim stret sapos ol i laik win.

Chile bai misim tripela pilaia Fransico Rojas, Nelson Parraquez na Moises Villaroel bikos ol i kisim yelo kat.

## Norway i surik long beting 150-1 i kam long 50-1

NORWAY wampela kantri i nogat nem long soka i soim sempion kantri, Brazil, olsem em u i sempion taim ol i winim ol 2-1 asen nait.

Maski ol Norway i win, Brazil i kamap namba wan kantri long winim Wol Kap.

- Maket bilong ol kantri i win em
- 5-2 Brazil
  - 11-2 Argentina, France, Netherlands
  - 7-2 Germany
  - 8-1 Italy
  - 14-1 Ingran
  - 25-1 Nigeria, Yugoslavia
  - 28-1 Spain
  - 33-1 Croatia, Romania
  - 50-1- Norway
  - 66-1 Chile
  - 100-1 Chile
  - 125-1 Mexico
  - 150-1 Denmark
  - 200-1 Belgium, Paraguay
  - 500-1 Bulgaria, Saut Afrika
- Wol kap logo

## Norway autim tiket bilong wol sempion, Brazil

GUTPELA win bilong Norway 2-1 egens long Brazil i helpim tru kosa Egil Olsen long holim yet wok olsem kosa.

Olsen i tingting long lusim wok kosa sapos Norway i lus long Brazil. Tasol nogat, em i sensim tingting gen long stap kosa yet.

Brazil i wok long go pas long 1-0 bipo long fultaim. Na dispela i pasim olgeta tingting olsem Olsen em pinis wok nau. Tasol nogat, ol Norway i kam-bek long las minit na mekim save stret long ol wol sempion ya.

Olsen i tok em i no bilip olsem dispela kain ol gol i ken kamap ya.

Man husat i sutim penalti gol Kjeti Rekdal i tok dispela gol i hatwok tru taim ol Norway i putim gol.

Dispela win bilong Norway em i kamap olsem bikpela histori stret ya.

### PORT MORESBY NATIONAL YOUTH SOCCER CUPS CHALLENGES

6th July to 11th July 1998

Sir John Guise Stadium Port Moresby.

Age Groups U7 to U17.

Round Robin/Knockout Tournament.

For Cup and Plate Trophys.

Age Group National Titles to be won.

Teams from all Provinces are challenged to attend.

Port Moresby Schools Soccer Regulations apply with FIFA rules.

Register your team for 1998 or book your place for 1999 by filling in the form below and return complete with registration fee on a first come first served basis. Visiting Teams shall have high priority. Registrations to close on the 19th June 1998.

#### Entry Form Port Moresby National Youth Soccer Cups


Contact Name	.....					Address	.....					
School Club	.....					Fax	.....					
Phone	.....											
Sponsors Name	.....					Address	.....					
Teams to Attend	U7	<input type="checkbox"/>	U8	<input type="checkbox"/>	U9	<input type="checkbox"/>	U10	<input type="checkbox"/>	U11	<input type="checkbox"/>	U12	<input type="checkbox"/>
Age as at 1 Jan '98	U13	<input type="checkbox"/>	U14	<input type="checkbox"/>	U15	<input type="checkbox"/>	U16	<input type="checkbox"/>	U17	<input type="checkbox"/>	U17 Girls	<input type="checkbox"/>
Total Registration Fee (K30 per team)	.....											
Year of Attendance (Tick the box)	1998	<input type="checkbox"/>	1999	<input type="checkbox"/>								

Further information will be provided only upon receipt of both Entry Form and Registration Fee

Post/Fax form to: The Chairman  
Port Moresby National Youth Cups  
P.O. Box 35  
Waigani, NCD  
Fax 326 0722 / 301 3139(b)  
Ph 326 0722 / 301 3264(b)  
Attn: John Mogi

or The President  
Port Moresby Schools Soccer Assoc.  
P.O. Box 1948  
Boroko, NCD  
Fax 325 4614 / 325 0091(b)  
Ph 325 4614 / 325 6033(b)  
Attn: Joe Heenan

### Kas bilong Nialin bilong TST Stars



□ Noken ting em Ronaldo bilong Brazil, nogat ya. Em samting ya bilong Bisini soka graun, Carol Nialin bilong Stars i soim stall bilong em.

## Divain Wot Yunivesiti i gat nem long soka

### KIWURAM KANAKO i raitim

OL studen long DIVINE Word i wok long karim nem bilong Yunivesiti long Madang taim ol i soim stail bilong ol long soka las wik Sarere.

Yunivesiti i gat nem long pilai soka na long las Sarere ol bin soim sampela moa pawa na stail we ol save haitim taim ol bungim biknem tim Momase long Laiwadan.

Divine Word na Momase i bin pilai strong tumas na tupela i putim wan wan gol tasol.

Taim referi Bonny Pongo i winim wisil ol sumatin i no wet. Joe Pokarup wantaim ol wanskul bilong em i pilai gut tru, we ol bin salim bal i go sua long lek bilong Pokarup, husait i kikim wanpela gutpela bal we i abrusim ol Momase tasol Malakai Wari i bagarapim, na wok na kailim, bal i go ausait.

Ol sumatin i no wari long dispela olsem na ol i wok strong moa yet na ino long taim umben bilong Momase i solap.

Dispela gutpela gol i kam long Jackson Ambuntak we ol wanlain bilong em i pilai gut tru na kisim dispela bal insait long banis bilong ol yet na kam abrusim olgeta lain Momase na taim, Abuntak i kisim bal, em nau husait inap long holim, em Ambuntak i makim, gut na sutim nambawan gol igo insait long hankais sait bilong umben bilong Momase.

Ol DWU sumatin i pilai hariap tumas we i makim ol chako i mekim wok long sampela ailan long Manus. Yes, biknem, pilai man bilong ol Gabriel Rooney i mekim bikpela wok long ron i redim bal bilong pairapim umben bilong Momase.

Tasol ol Momase i pilai wankain tasol. Ol i pilai loli loli na isi long bal. Em stail pilai bilong

Momase na i stap long blut pinis- "Darlon Iyende" na bai hat long tokim ol Momase long lusim.

DWU i no amamas olsem na ol traim, traim long kikim sampela gol. Wanpela gutpela sans gol bilong ol sumatin i bin kamap taim Jimmy Nali i kikim bal abrusim ol beklain bilong Momase tasol ating lewa bilong Nali i wok strong tumas olsem, na bal i pundaun ausait long mak bilong Momase.

Stail bilong Momase em narakain. Hau bai yumi save sapos ol i laik pairapim, umben bilong birua. Na tru yet, Alfonz Kapundik i ron gut tru wantaim bal na tiam em i kik, man bal i sua insait long han bilong gol kipa bilong DWU. Sapos Kapundik i giaman liklik ating em bai pairapim, umben bilong DWU.

Orait Momase i wok hat yet i go na Jacob Ricky Lambert i pairapim umben bilong DWU. Dispela em wanpela gutpela gol we ol fowat bilong Momase i surikim bal i go na abrusim ol DWU, na salim i go long Lambert long kikim gol.

Insait long namba tu hap, ol studen long Yuni i pilai strong moa yet. Tupela paia lait man hia em long Wari na Pokarup i bin

pilai strong gen tasol ol kik bilong ol i abrusim mak bilong Momase. Ol DWU i no kam bilong pilai kaskas, nogat ol i kam long pilai "iau Serious" soka wantaim biknem, tim, Momase.

Ol i pilai i go na Jackson Ambuntak na Malakai Wari i traim, long pairapim umben bilong Momase tasol ol i popaia.

Momase i pilai gut i go tasol Tarsie Subam Dumwar i krang long kik na referi ponggo i soim em retpela kat na rausim em long pilai. Maski Momase i sot long wanpela lek, ol i pilai olsem, olgeta bilong ol istap na planti taim, ol i bagarapim ol gutpela kik we inap long ol putim gol.

Momase i bin gat tupela gutpela sans taim, ol i bin kisim tupela kik i kam long kona. Tasol ol i no bin gat sans. Ol lain bilong Gabriel Rooney i sanap strong moa yet olsem, ol sap rip bilong momote, Manus na ol mangi bikples i painim rot stret.

Las gutpela sans gen bilong Momase i bin kamap gen taim Lambert i kisim bal na ron i kam, abrusim, ol DWU wantaim, golkipa bilong ol na klostu inap long Lambert i pairapim tasol wanpela DWU pilaia i spit tru i kam na sakim dispela gol i go ausait.

## Kantri bai kisim strongpela salens long Lae basketbal

### FRANCO NEBAS i raitim

KANTRI bai kisim strongpela salens long Lae wimen basketbal kompetisen taim em bungim NS Busu long bikpela gem long Sande.

Kantri bai traim long win bihain long em i lus las wiken long BHP Stars 38-36.

Dispela wik ol i stretim ol pinis wok long trening strong long bungim NS Busu.

NS Busu tu em wanpela strongpela tim taim basketbal i bin strong long Lae. Tasol nau planti pilaia i lusim klab na go pilai long arapela klab.

Tupela susa ya Ruby Kama na Roni Kama nau i holim stia bilong Busu. Ol i wok long pas long gem plen long helpim tim i win.

Kantri em i wanpela nupela tim we i gat nupela na olpela pilaia. Ol i gat eksperiens pilaia olsem Betty Bani,

Agatha Sinamau na Rachael Keura long strongim tim.

Agatha em susa bilong biknem Kumul pilaia, Korul Sinemau. Em wantaim Bani na Keura bai ran long fowat na Irene na Tina bai stap sambai tasol long helpim tim i win.

Kantri i gat spid na ol i longpela moa long ol meri Busu. Dispela gem bai lukim ol sapota i amamas inap long pinis bilong pilai.

Long ol arapela gem Sprite bai autim Sipaia. Arapela strongpela gem bai kamap namel ong Butibam na PNGBC, na Stars bai skelim strong bilong ol Natives.

Pilai bilong Natives na Stars tu bai strongpela gem we Stars bai traim long bekim dinau long Natives taim ol i winim ol long pri-sison knot aut long dispela yia. Tupela tim wantaim igat spid na stail tasol husat i kamap wantaim liklik asua bai kamap wina.

## Mosbi bai holim nesenal dat sempionsip

PAPUA Niugini Dat Federesen bai holim namba 8 nesenal sempionsip bilong em long Pot Mosbi long Independens wiken.

Federesen i gat samting olsem 24 asosien. Na i luk olsem olgeta bai kamap long dispela sempionsip.

Ol asosiesen husat bai stap insait long dispela sempionsip bai putim tupela tim bilong man na wanpela long ol meri. Dispela ol tims bai salens long tim gem, tripel, dabol, mix dabol na singel long divisen.

Wina bilong ol dispela resis bai kisim prais mani, tropi na medal na tu namba tu ples na namba tri.

Manus i winim taitel long 1996 nesenal sempionsip na i holim yet dispela taitel. Na tu ples i go long Elkadi dat asosien, namba tri Wapennmanda na namba 4 ples Kimbe. Ol bikpela asosien olsem Lae, Pot Mosbi na Mt Hagen i no bin kamapim long dispela resis.

Presiden bilong PNG Dat Federesen John Nakilai i tok olsem ol asosiesen husat i laik pilai insait long dispela resis mas bihainim olgeta lo bilong federesen olsem, baim K250 afilasen fi, K20 pilaia rejistar fi, salim konstitusen bilong asosiesen nem bilong ol eksekutiv i go long nesenal.

Nakilai i tok, "Long nau yet em Pot Mosbi na Wapenamanda tasol kam bek long em na i baim hap fi pinis. Ol arapela asosiesen i no kam yet wantaim gutpela toktok we bai ol salens long dispela resis o nogat."

Sapos ol asosiesen i ken salim ol dispela samting federesen i laikim long em i go long nesenal presiden P.O Box 41, Lorengau, Manus Provins o ol i ringim long telefon namba 470 9378 o fax/telipon

470 9251. Olgeta mani mas deposit igo long PNGDF akunt namba 0144578 PNGBC Goroka branch na salim ol resit go long presiden."

Long dispela taim yet, federesen bai makim ol nupela eksekutiv bilong em bihain long taim bilong ol opela i pinis long septemba 1996. election i bin no kamap bilong wanem i bin nogat taim long holim AGM.



• **Lephan: Sharol Marsipal-Kupe bilong Stars i traim trikim Geraldine Eka bilong Telikom. Ol meri PTC i lusim waia bilong ol Stars 5-0 long Mosbi soka resis las wiken. Poto: Ivan Bayagau.**

## Telikom i flai antap long Mosbi wimen soka

### FRANCOS NEBAS i raitim

TELIKOM i wok long flai moa antap long PMSA wimen soka resis bihain long ol waraiim TST Stars 5-0 long Bisini oval long wiken. Dispela gem namel long tupela tim ya em i luk olsem gren fainel bilong las yia we ol Stars i bin autim Telikom 1-0 long winim taitel.

Ol i meri Stars i laik mekim wankain las wiken tasol ol i popaia na Telikom bagarapim sindaun bilong ol. Planti sapota i ting bai wanem tim i win bai skorim wan o tu poin. Tasol ol meri Telikom i laik soim olsem win bilong las yia em i giaman tasol olsem na ol susa i rausim stret sket bilong ol Stars.

Intanesenel strakia Nelly Taman yet i sutim tripela gol na Margaret Aka i lukautim tupela gol.

Tupela straiika ya i poroman gut tru na olsem ol i sutim dispela ol gol. Ol telefon meri i no westim.

Insait long tri minits tasol difenda Fredrica Siwin i salim wanpela gutpela bal i go long Taman husat i no bin gat birua i was long em long makim gut mak na brukim kiau. Dispela gol i mekim ol Stars ai op na wok hat long traim bekim dispela gol.

Ol fulbek bilong Telikom Siwin, Tabitha Suwae, Fiona Wakes na Judith Michael i save sambai tasol long rausim bal long ol birua.

Taim dispela wok kamap i stap Taman na Aka tu wok long redi tasol long kisim bal i kam long ol difendas bilong tupela. I no long taim Taman i kisim wanpela gutpela bal gen na net bilong Stars i guria istap long apim skoa i go long 2-0. Dispela tupela gol i stap olsem i go inap long hap taim.

Long namba tu hap, gem i luk olsem wansait taim Telikom i save holim bal na go insait long hap bilong Stars. Taim dispela i kamap em tupela stail meri ken long fran-

lain Taman na Aka i poroman gut na pairapim arapela triplea gol.

Tupela gol em Aka i skorim na Taman i pasim get wantaim las gol. Ol lain long Stars husat i bin traim hat em Ikanau Matangiau, Freda Joss, Regina Maino na Agnes Juwana.

I gutpela long lukim Agnes i kambek gen. Em i wanpela strongpela pilaia we i ken brukim difens na sutim gol. Tasol dispela em bipo, olsem ol sapota bilong Mosbi na Lae soka i save long em. Poin lata bihain long las wiken Telikom 21, Yunivesiti 17, Stars 11, No'mads 10, Blu Kumul, Sobou 8, Wanzesi 7, Tarangau 7, Naniu na FBH Difens 2.

Arapela gut nius tu em, Telikom man tu i autim Adau 1-0. Tim yet i no bin pilaiim ol gutpela gem long stat bilong sisen olsem na kosa Joe Ganisi i wok long wok hat yet long plenim ol arapela gem i stap.

Plantu ol pilaia bilong Ginisi i bin

stap nating las yia bihain bikos ol i nogat tim.

Tasol ol i wok long statim gen tim long dispela yia. Dispela yia em i gat ol pilaia olsem Raymond Nasa, Francis Moyap, tupela brata ya Larcel na Terry Pui, Ross Napa Sau na planti arapela moa.

Long gem bilong ol wantaim Adau i strong stret we dro i bin bai kamap tasol las




minit i lukim gutpela bal wok long difenda Larcel Pui i setim igo insait long gol eria bilong Adau we midfilda Charlie Alfred i opim lek na bal i go insait painim stret straiika Esron Burege long pinisim wok igo long ful taim long kamap wina 1-0.

Ol lain husat traim hat long Adau em, George Bukoya, Ben Micky na Richard Taureha

na Telikom, Larcel, Terry, Burege, Ken, Raymond Nasa na yangpela Geno Kilagi.



# WANTOK SPOT



□ Ol Enga Mioks i redi tasol long bungim ol lain Mendi Muruks long dispela wiken.

## Robert Tela holim ki bilong Mioks

### HENRY MORABANG i raitim

KUMUL pilaia Robert Tela i holim ki bilong Enga Mioks long winim Mendi Muruks long dispela wiken. Pilai namel longtupela ya bai kamap long Minj, Westen Hailens.

Las wik Tela em i stap riserv. Sapos Mioks i laik, kosa Toksy Nema i mas makim em long stap long stating tim.

Tela husat i wanpela strongpela pilaia husat i ken sensim gem plen long las minit bai kisim gutpela helpim i kam long Stanis Kale. Kale tu em wanpela pilaia husat i bin pilai wantaim Rabaul Guria bipo.

Kosa Nema bai makim kepton Thomas Neah, Paul Minape, Belli Iangalio, Tole Londe na Billy Morrison long go pas long fowat. Dispela fowat bilong ol i strongpela na save bikipela strafe o hevi long arapela birua bilong ol.

Long beklain em Nissan Pakistan, Nathan Pisso, Lucas Sigin, na Leo Soyale

bai resis wantaim ol birua bilong Mendi Muruks.

Mioks i gat gutpela rekot egens long Muruks. Ol i bin winim ol boi Mendi na sapos ol bihainim dispela kain gem plen, ol i ken win gen long dispela wik.

Ol riserv pilaia olsem Issac Kia, George Aipi na Jacob Kipongi bai sambai tasol long kisim ples.

Kosa bilong Lae Bombers Steve Malum i makim pinis olsem Muruks bai pilai long gren fainel.

Sapos toktok bilong Malum i stret, ating kosa Bobby Ako bai yusim sem tim bilong em gen long dispela wiken long salensim Mioks.

Muruks i gat ol biknem pilaia long winim dispela gem. Mioks em bai putim skin tasol long Minj.

Kosa Ako i gat ol pilaia olsem kepton Ruben Ruing, Johnsson Essau, Bobby Mangope, Thomas Undupia na Petrus

Thomas, long beklain long winim dispela gem.

Long fowat, aiman Raymond Karl, Cedric Kengi, Daniel Raymaster, Samuel Pinpin, Willie Gabriel, Joe Mek na Isacc Paul bai brukim difens bilong ol Mioks long winim dispela gem.

Arapela riserv pilaia em Kore Philip na Jonnybot Toank.

Long lukluk bilong gem, Mioks i gat nem. Ol i winim pinis Muruks na sapos ol i no was gut, Mioks bai rapim ol gen long dispela wik Sande.

Tasol Muruks i gat eksperiens long winim dispela gem. Las wik kosa i apim nem bilong ol pilaia bikos ol i fit. Na sapos ol i wokim wankain pilai gen long dispela wiken, ol bai win ya.

Dispela gem long painim aut husat bai lus na husat bai go het long pilaiam lusa bilong Tumbe na Eagles. Wina bilong Tumbe and Eagles bai sambai long gren-fainel.

## Rapatona bai sekim Yuni

### FRANCO NEBAS i raitim

STRONGPELA kik resis bilong Mosbi soka bai kamap namel long tupela top tim, Rapatona na Yunivesiti long dispela wiken long Bisini oval.

Yuni bai bungim ol boi Manus.

Rapatona husat i ran namba tu bihain long Yunivesiti bai traim winim dispela gem long stap wantaim ol poin lata. Bihain long ol gem i kamap las wik, poin lata i sanap olsem Yunivesiti 25, Rapatona 22, Babaka 17, Difens 17, Momase 14, Guria 13, PS Rutz 13, Blu Kumuls 12, Tarangau, Telikom 10, Adu Yellow Page 10, Hoods 7, Sobou 6 na Kurti-Andra 3.

Insait long dispela gem tu, bai yu lukim planti ol pilaia i save karim nem bilong kantri long ol bikipela intanesenel tonamen olsem mini Saut Pasifik Gems, Saut Pasifik Gems, Melaneisan Kap na tu Wol Kap kwalifaia.

Tupela tim wantaim i save pilai wankain stail bilong kik. Tasol wanem tim i win em bai strong bilong wanwan pilaia.

Yunivesiti i gat ol pilaia olsem Steven "Sticky" Mune na boi nogut bilong Makam Hans "Geman" Gewambang husat bai poroman long pairapim umben bilong Rapatona.

Tasol dispela bai i no inap isi bikos ol boi Manus bai sambai long tupela. Gokipa Willie Bera em i olsem urita ya olsem na ol straika bilong Yunivesiti i mas tingting gut.

Duri Yarawi na Carol Panui bai go pas long beklain bilong Rapatona. Kepton Geoffrey Emang na Peter Punau bai bosim midfil long setim ol straika olsem Welsey Waiwai.

Long sait bilong Yuni, Desmond Waku, Batman Furigi na Ben Lakasa bai lukautim midfil long sekim tupela straika Mune na Gewambang.

Long beklain i gat stenbai kosa Joe Aisa, Beno Luluai, Albert Eka na Jackson Ngahan bai lukautim.

Long ol arapela primia gem, Momase bai nekim Hoods, Tarangau

bai pait wantaim Babaka, Telikom bai lukluk long namba 4 win egens Kurti-Andra,

IBS PS United bai traim bun wantaim Adu Yellow Page, Sobou bai go daun long Guria na Blu Kumuls bai autim Difens.

Insait long gem bilong ol meri, Telikom bai kisim strongpela salens i kam long Yunivesiti. Telikom i no lusim wanpela gem na Yunivesiti bai traim brukim rekot long win.

Top straika Nelly Taman na Margaret Aka bai goa pas wantaim halivim kam long Fredica Siwin na Tabitha Suwae long dispela mets bilong ol.



# IT'S THE SP CUP

## THE NO1 GAME



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.